

KURATIDZA SHOKO RAKE

Ngatikotamisei misoro yedu kwchinguvana. Baba vanodikanwa vari Kudenga, tinotenda kuti tiri pano manheru ano. Isu, isu tinotenda nokuti tinoziva kuti Hupo hweNyu hunesu pano. Zvino tinonamata kuti Mushumire kune mumwe nemumwe wedu, sezvatinoshuva. Tinozvikumbira nemuZita raJesu. Ameni. (Mungagara zvenyu pasi.)

² Ndinongonzwa zvakakanaka kuva nemamaikirofoni aya achishanda. Ndine hurombo kwazvo ndakaita sokuti kanganisei nezuro, Mharidzo yandaida kuti muwane zvakanyanya kwazvo.

³ Uye ndaida kuti muve nechokwadi chokuti mazviona. Ndiyo ho—hoko yatinayo. Hatina kusungirirwa nekereke. Takasungirirwa muna Kristu, muri kuona. Ndiye Nzira yega. Ndiye nzvimbo yega yechengetedzo, nzvimbo yega Mwari yaakaisa Zita raKe. Zvino Mwari akati Achasangana nevanhu munzvimbo yaAkasarudza kuisa Zita raKe; kwete pasuwo ripi zvaro, asi pasuwo raAkasarudza. Uye panzvimbio iyoyo ndipo paAizosangana nevanhu, uye ipapo chete. Uye tinoona kuti Mwari haana kumboisa Zita raKe pese-pese asi muMwanakomana waKe, Jesu Kristu, semwana anogarotora zita rababa.

⁴ Zvino iwe unoti, “Zvakanaka, zvinopinda papi muzuva ranhasi? Mumwe nemumwe achiti, ‘Ndiri muna Jesu.’”

⁵ Iye ndiye Shoko. Kuti, “Pakutanga Shoko rakanga riripo, Shoko rakanga riri kuna Mwari, uye Shoko rakanga riri Mwari. Shoko rakazoitwa nyama rikagara pakati pedu.” Zvakare, zvakanyorwawo muna Zvakazarurwa chitsauko 19, patinoMuona achiuya, Mwenga neChikomba, nguwo yaKe yakanyikwa muRopa, “Zita raKe rainzi ‘Shoko raMwari.’” Iye ndiye Shoko raMwari.

⁶ Uye, ndizvo, Ndiye simba rinomutsa. Ndiye Mweya Mutsvene anova, iro—iro simba rinofambisa rinopinda muhurongwa, Mashoko, anoita kuti Rirarame. Zvino zvese zvinofanira kushandirana pamwe chete, kana kuti hazvishande. Zvinofanira kutotora Bhaibheri rese zvaro, Kristu wese, Evhangeri yakazara.

⁷ Ndinoda kuti, kune boka iri randakaona nezuro manheru paterevhizheni, ndichiziva kuti vaizenge varipo, uye ndikavaona. Ndinoda kutaura chimwe chinhuhu pahama idzi, avo vakanga vari paboka iroro, kwaive kunyatsopindura mibvunzo kune hunyanzvi kwakadaro! Ndiri mutsoropodzi chaiye, munozviziva, zvakadaro, asi pakanga pasina chekutsoropodza ipapo. Zvanga zviri zvemazvirokhwazvo, uye ndaigona kuwirirana nazvo, zvizere.

[Ungano inouchira maoko—Mupepeti.] Maita basa. Ameni. Mhinduro idzodzo dzainyatsonanga. Ndakanyatsozviyemura izvozvo. Ndinongoshuva kuti dai ndaive nefirimu rekuzoratidza kereke yangu kumba. Zvanga zvakakanakisa kwazvo.

⁸ Uye ndinotenda kwazvo kuziva kuti—kuti Mwari akashanda mune dzimwe nzvimbo, kunze kwemapoka edu echiPentekosti, uye vari kusimudza varume, idzo mbeu dzaMwari, dzanga dzakagara kunze uko kwemakore ese aya, dzichimirira kuti Chiedza chipenye pamusoro padzo.

⁹ Uye zvinotipawo yambiro, shamwari, kuziva kuti Jesu akati, “Kana mhandara iyi yakavata payakatanga kuuya kuzotenga Mafuta, ndipo paitouya Chikomba.” Saka tinogona kuona naizvozvo, kana tava kuona veEpiscopalian, Presbyteriani, Methodisti, Baptisti, Lutherani, vachiuya kuzotora Mafuta, ipapo ndiyo nguva yakauya Chikomba. Ngatirangarirei izvozvo.

¹⁰ Handina kumbova naBilly, mwanakomana wangu, kutaura zvakadaro kwandiri sezvaaita kanguva kadiki kapfuura. Ati, “Baba, Handikuudzei zvekuita. Handirevi kukufadzai nechinhu chipi zvacho, asi,” ati, “baba, pane zvese zvamungaita, isai nguva yenyu yese pane vanhu vanorwara.” Ati, “Handisati ndamboona vanhu vanorwara vakawanda kudai!” Ati, “Ndapa makadhi mazana maviri mukanguva kadiki-diki kana yakangodaro.” Ati, “Pane vanhu vakawanda kwazvo vari kurwara!” Kashoma kwazvo kaanondiudza izvozvo.

¹¹ Zvino ndauya manheru ano nezvinyorwa zvishoma zvakanyorwa zasi pano, nemashoko pamusoro pekutongwa kuri kuuya, uye ndichiziva kuti takagara pano manheru ano tiine kutsamwa kwaMwari kuchizunguzika pasi pedu, uye nekukurumidza zvichatsvairwa. Uye tichiziva kuti kutsamwa kwaMwari kwakamirira; panguva yazvichangotaurwa, zvichabva zvaperera, kune mamiriyoni. Uye ndichiziviza mumoyo mangu, uye ndichiziva kuti ndizvo izvozvo! Uye tinoona vakawanda vanorwara, vachimanikidzira nekudhonza.

¹² Uye ndafunga, “Manheru ano, vazhinji vavo Makristu.” Uye regai nditi kune ivava, imi vana vaMwari. Chese chamunoita, regai zvime zvese zvipfure. Imi shumirai Mwari, masikati nesiku, nemoyo yenyu yese. Imi, munogona kunzwa kuti pane chimwe chinhu chakakanganisika. Unokwanisa kuzvinzwa paunenge uchifamba mumigwagwa, unongo... nekwese kwaungaenda. Unoziva, kana uri wemweya; uye ndinoziva kuti ndizvo zvamuri.

¹³ Ndakanga ndichitaura nemumwe murume, Hama Stromei. Handizive kana Tony aripo pano, kana kwete. Iye, anga aripo... [Imwe hama inoti, “Tony Salameh?”—Mupepeti.] Tony Salameh, Salameh, Salameh? Kwete. Ndawana Tony asiri iye. [Imwe hama inotaura chimwe chinhu.] Kwete, handiye Tony wachos. Uyu ndiTony weku—weku—wekuTucson. Zita rake rinonzi

ani? [Mumwe munhu oti, “Stromei.”] Stromei! Ndinoziva kuti ndiSalameh, Stromei, kana rimwe. Ndinongo... .

¹⁴ Muchitoro chake, rimwe zuva, pane murume akapinda, aionekera kwazvo, aitaura chimwe chinhu chakadzosa ndangariro kwandiri, pandakanga...nguva yekupedzisira pandakanga ndiri ku—kuIndia.

¹⁵ Apo, pandinofunga kuti Ishe akatipa mhomho hurusa yatati tambova nayo panguva imwe chete, kwakanga kuri kuBombay. Takatotadza kunyange kuwana nzvimbo dzekuvaisa, makumi ezviuru nezviuru zvevanhu.

¹⁶ Tisati tasvikako, pane bepanhau rakadudzirwa. Zvakanaka, rakanga riri, India inyika ine mitauro miviri, raiva—raiva riri bepa reChirungu. Zvino rakati, “Zvakanaka, kudengenyeka kwenyika kunofanira kunge kwapera, shiri dzava kubhururuka dzichidzokera kumba kumatendere adzo.”

¹⁷ Mazuva mashoma kudengenyeka kusati kwaitika, uko kwakawisira pasi madziro nezvakadaro. Tushiri tudiki twunozvitsvagira pekuhwanda mumatombo, twovaka matendere atwo; uye masikati kana pakati pezuva, apo zuva parinenge richipisia, mhuka dzese dzinomira dziri pamadziro ematombo iwaya, kuti dzipinde mumumvuri. Kwemazuva maviri, shiri dzakagarira kure mumiti, dzaisadzoka kumatendere adzo; uye kwemazuva maviri, mhuka, makwayi nemombe, dzaisadzoka masikati, kana kungotenderera pamadziro iwayo. Dza—dzakagarira kunze muminda dzakazemberana, kuti dziwane mumvuri.

¹⁸ Ipapo kamwe-kamwe, kwakaita kudengenyeka kwenyika, kwakazunguza madziro kukapwanyira pasi zvivakwa. Uye, munona, kana dai tushiri utwu twakanga twurimo, twungadai twakaparara. Kana dai mombe dzakange dzakamira pasi pacho, nemakwayi, zvingadai zvakaparara. Mwari achiyambira zvisikwa!

¹⁹ Mazuva mashoma apfuura, tiri muchitoro chaHama Tony, ndaitereru mumwe murume imomo akati... . Kudengenyeka uku pakwakaitika kuAlaska, airedza zasi kwatinoti kuStony Point, kuMexico. Akati, “Shiri dzaisadya, uye hove dzaisadyira. Pakanga paine chainge chakananisika. Zvino, kamwe-kamwe, kwakabva kwava nekudengenyeka kwepasi.”

²⁰ Zvino pane rimwe zuva, apo kumwe kuya pakwakaitika kuIndia, kana chero kupi kwakwaiva, akati airedza zvakare. Akafunga, “Zvakanaka, zvinoshamisa. Hove idzi dzinodya senguva dzino. Hapana kasaisai mumvura, chero kupi. Mvura yakanyatsogadzikana, nguva yakanakisisa yekuti hove dzidyire, asi dzaisadyira. Uye shiri dzese dzinosimbogara dziri panze ikoko, shiri dzemagulls, dzichinhonga hove idzi nezvakadaro, dzese dzaifamba-famba kumhenderekedzo, dzakaungana dzakazemberana. Muchinguva chidiki, tusora twemugungwa

twunobva pasi twakatanga kubuda kumusoro *saizvozvo*, kwakanga kwadengenyeka kune rumwe rutivi rwenyika.” Munoona, idzo hove dzakatoziva kuti pane chakanganisika, pane chaigadzirira kuitika. Shiri idzodzo dzaizivawo zvimwe chete.

²¹ Zvechokwadi, kana Mwari akapa hove neshiri kugona kunzvera, Angazopa zvakawanda zvakadini kune vana vaKe—vaKe! Tinoziva kuti tava panguva yekupedzisira, uye kutongwa kwamirira, saka ngativei nokuremekedza chaizvo. Tizirai kuna Mwari nemoyo yenu yose! “O Kapenaume, iwe unosimudzirwa kudenga, uchaburutsirwa zasi mugehena,” uye nhasi igere pasi pemvura. Chingorangarirai, monamata.

²² Zvino, manheru ano, ndinoda kuverenga pane imwe nzvimbo pano muGwaro, kwenguva shoma. Tichazonamatira vanorwara. Billy ati iye apa makadhi ekunamatirwa akawanda. Uye akapa mamwe nezuro, uye handina kumbosvika pane chero awo usiku hwapfuura. Ndakashamiswa, apo Mweya Mutsvene wakauya... Wakango... Haukwanise kuUita kuti ushande. Zvakangofanana nechekuchinjisa magiya chidiki, unoziqidhonzerwa mune rimwe giya. Ndimi vacho munozviita zvokushandisa Mweya Mutsvene, kwete ini. Ndimi munozviita pachenyu. Saka ini, husiku hwapfuura, ndakacherechedza kunyangé mukunzvera zvakavanzika, hazvina kunyatsopindirana nevanhu zvakanaka. Vaisaratidzika sevanozvitambira. Ndakazviona, pano nguva shoma yapera, zvichiita kunge, tingangoti, pandainge ndichitaura, ndichiisa maoko pane vanorwara, ivo vanoziva.

²³ Tinofanira kucherechedza kuti matiri takapiwa, isu vanotenda Jesu Kristu uye takazvarwa neMweya waKe tikazadzwa nesimba rinomutsa, iro simba riri mamuri. Nekuisa maoko, pane vamwe, sezvakaitwa nevadzidzi nemuzera rose, Wakapodza varwere chaizvoizvo, nokumutsa vakafa, Ukaratidza zviratidzo, nezviporofita. Uye Mweya mumwe chete iwoyo wairarama pakati pevaapostora vepakutanga uri kurarama mukereke nhasi, uchingoshanda zvinhu zvimwe chetezvo. Uye nekuchimbidzika kwatinogona kucherechedza izvozvo! Munoona, hazvinei nekuti uri kushanda zvakadii, unofanira kuzvicherechedza uye wozvitenda. Hapana kana chimwe chete chakanaka chazvinoita, kusvikira wazvitenda. Asi ipapo paunongozvitenda, matambudziko ako anobva apera. Ichokwadi ichocco.

²⁴ Zvino ngativhurei muGwaro. Ndanga ndakagara panze apo, nguva shoma yapfuura, ndikanyora pasi mamwezve Magwaro mashoma, ekushandura nyaya yangu manheru ano. Zvino ndinoda kuverenga mamwe kubva muShoko raMwari, kubva muBhuku raMutsvene Ruka, chitsauko 8, tichitangira pandima 40. Tererai zvino, ndichaverenga parefu.

Zvino zvakaitika kuti, apo, Jesu wakati achidzoka, vanhu nomufaro vakamugamuchira: nokuti vose vakanga vakamumirira.

25 Haangave here maonero akanaka eungano manheru ano?

Ipapo, tarirai, kwakauya mumwe murume wainzi Jairosi, uye wakanga ari mukuru wesinagoge: akazviwisira patsoka dzaJesu, akakumbira zvikuru kwaari kuti auye apinde mumba make:

Nokuti wakanga une mukunda mumwe chete, waiva nemakore anenge gumi namaviri okuberekwa, wakanga otandadza. Asi wakati achienda vanhu vazhinji vakamumanikidza.

Ipapo mumwe mukadzi waiva nokurwara kwekubuda ropa makore ane gumi nemaviri, wakanga apedzera kuna vana chiremba zvose zvaairarama nazvo, asingabetserwi kunyange nemumwe wavo,

Akauya mushure make, akabata mupendero wenguwo yake: pakarepo kubuda kwake kweropa kukaguma.

Zvino Jesu akati, Ndianiko wandibata? Zvino vose vakati vachiramba, Petro nevaiva naye vakati, Tenzi, vanhu vazhinji vanokumanikidzai nokukutsikirirai, zvino moti, Ndiani wandibata?

...Jesu wakati, Mumwe wandibata: nokuti ndanzwa kuti simba rabuda mandiri.

Zvino mukadzi wakati achiona kuti haana kuvanzika, akauya achidedera, akazviwisira pasi pamberi pake, akamuudza pamberi pavanhу vose kuti wakanga amubata nemhaka yei, vuye kuti wakaporeswa pakarepo.

Zvino akati kwaari, Mukunda, usatya: kutenda kwako kwakuporesa; enda hako nerugare.

Zvino wakati iye...achitaura, mumwe akasvika achibva kumba kwemukuru wesinagoge, akati kwaari, Mukunda wenyu wafa; regai henyu kutambudza Tenzi.

Asi Jesu wakati achizvinzwa, akamupindura, akati, Usatya: tenda bedzi, iye uchaponeswa.

Zvino wakati achisvika mumba, akasatendera munhu kupinda naye, asi Petro, ...Jakobho, naJohane, nababa namai vomusikana.

Zvino vose vakanga vachichema, ...vachimuririra: zvino iye akati, Musachema; haana kufa, asi akavata.

Vakamuseka zvokunyomba, vachiziva kuti wafa.

Asi wakavabuditsira panze vose, akabata ruoko rwake, akadana musikana, achiti, Musikana, muka.

Ipapo mwuya wake wakadzoka zvakare, zvino akamuka pakarepo: akaraira kuti apiwe zvekudy.

Vabereki vake vakashamisa: asi wakavaraira kuti varege kuudza munhu zvakaitwa.

²⁶ Zvino ngatinamatei. Baba vanodikanwa vari Kudenga, tichiverenga Shoko iri, tinoziva kuti ichi ichokwadi. Izvi zvakaitika. Haisi ngano yatinogona kuverenga kubva mubepanhau kana rimwe bhuku renyaya isina kumboitika, asi izvi zvabva muBhuku ratinoziva kuti iShoko raMwari. Tinotenda kuti zvakaitika. Tinotenda kuti uyu Jesu akaita chinhu ichi chinokosha, zviitiko zviviri pano, chemudzimai aibuda ropa, nemwana anga afa, tinotenda kuti Iye Mwanakomana waMwari, kuti Mwari vakaMumutsa kubva kuvakafa uye ndokuMuunza kwatiri, manheru ano, mumunhu weMweya Mutsvene.

²⁷ Uye tinotenda kuti Ari pano nesu husiku huno. Uye tichitenda kuti ndiYe mumwe chete zuro, nhasi, nokusingaperi, tsitsi dzaKe dzinosvika kuvanhu. Uye vanhu vachisvika kwaAri, zvibereko zvime chete zvakapiwa muzuva iroro ndizvo zvichapiwa muzuva ranhasi. Tipei zvakare, Baba, kuti tive nechizoro chitsva. Sekukumbirisa kwaita Hama Shakarian vachirevesa, chinguvana chapfuura, vakakumbira kuti vateereri vatende, tinokumbira zvakare nemuZita raJesu Kristu. Ameni.

²⁸ Ndinoda kutaura kwenguva shoma, ichange ingori nguva shomanene, nokuti ndinoda kuzounza vanhu vane makadhi ekunamatirwa kuno ndovanamatira. Zvino ndosiya zvime zvese asi ndongonamatira vanorwara. Asi tisati tanamatira vanorwara, tinofanira kupinza vanhu mumaonero iwayo. Maonero ndiwo anogarounza zvibereko. Maonero aunoita kuna Mwari.

²⁹ Pano pane mudzimai akabata nguwo yaKe, akapodzwa, anga ane chirwere chekubuda ropa. Musoja akaMupfira kumeso akaisa korona yemunzwa mumusoro waKe, haana kunzwa simba.

³⁰ Masvikiro ako. Zvinotora maonero. Uye ndizvo zvazviru manheru ano, shamwari inodikanwa, zvinotora maonero. Tiri, uye tinotenda kuti tiri, muHupo hwaJesu Kristu, asi maonero ako anounza zvibereko. Hurongwa huripo pano, uyewo nesimba racho rokufambisa. Kana ukangokwanisa kutanga, Mwari anozoita zvime zvese.

³¹ Zvino, chidzidzo ichi chandiri kuda kutaura nezvacho, kwekanguva kadiki, ndechekuti: *Kuratidza Shoko RaKe*. Zvino ichocco chinhu chikuru, kufunga nezvazvo: *Kuratidza Shoko RaKe*.

³² Zvino Mwari ane kwaniso yekuratidza Shoko raKe, manheru ano, sezvaAigara achiRiratidza. Uye Bhaibheri rakataurawo kuti, “Edzai zvinhu zvose. Mubatisise kune izvo zvakanaka.”

³³ Zvino makanzwa, pasina kupokana, makanzwa chirevo chakare, “Zviratidze, ndichazvitenda.” Asi izvozvo handizvo. Nguva dzakawanda ndakaona zvinhu zvakawanda zvichiratidza, zvakanga zvanyatsoratidza chaizvo-chaizvo nesainzi, asi zvakadaro vanhu vaisangozvitenda.

³⁴ Ndaitaura nemumwe murume, pano nguva shoma yadarika. Taitaura nezvekupodza kwaMwari. Iye akati, “Handingazvitende. Handinei nekuti zvii zvichaitika, uye kuti une umboo hwakadini hwekuratidza hwezvazvo, nazvino handizvitendi.” Ndizvo, ichokwadi, chero zvipi zvawaigona kuitira murume iyeye, iye—iye akarasika. Haakwanise kutenda. Hamuna chiri maari, kuti atende.

³⁵ Ndatkaita kachiitiko ka—kadiki pano, kuda vhiki rapfuura, sezvamunoziva mese kuti ndi—ndinovhima. Uye pandakadzoka kubva kumusangano wangu, ndainge ndichivhima shumba. Zvino mushure mekunge ndatamira kuArizona, zvakanaka, ndinofarira kuvhima mhuka hombe, uye ndinofarira kunge ndiri pakati pezvisikwa uye nekungozviona.

³⁶ Zvino, ini handisi mhondi. Ndinongovhima. Saka, handi—ndifarire kuparadza mhuka, handi—ndifunge kuti zvakanaka. Ndinofunga kuti chingori chivi chimwe kuuraya mhuka, kana usiri kuishandisa uye kana usiri kuzodzishandisa pane chinangwa, zvakangofananawozve nekuuraya zvime zvese. Ndinotenda kuti zvakashata. Hatifanire kudaro. Mwari akatipira kuti tiite chikafu uye nezvime zvinangwa, uye hatifanire kuzviparadza. Asi zvinenge zvataurwa nemutemo unogona kutora, zvakanaka. Asi usangozvitambisa.

³⁷ Zvino ndiri zasi ikoko, mwaka watotanga wezvinhu zvese. Shumba dzinouraya mombe dzakawandisa. Uye ndinoziva vachengeti vemombe vakawanda kumusoro munyika. Uye pese pavanourairwa, saka, vanondidaidza, kana shumba yapinda pakati pemakwayi. Imwe shamwari yangu, humwe husiku, yakarasikirwa nemazana makumi matatu nemashanu emadhora, muhusiku humwe chete, nekuda kweshumba imwe chete yaingouraya makwayana chete. Yakapinda, zvino, chaizvoizvo, dzimwe shumba dzese dzinofanira kuzobhadharira chivi chayo. Saka ndakauraya shumba iyoyo, zvino yakanga iri shumba hombe kwazvo, yakareba mafiti mapfumbamwe, uye ichirema zviri pedyo nemaviri neanoraudzira, saka yakanga iri—yakanga iri shumba hombe yakanaka.

³⁸ Zvino ndakazobva kunyika yeArizona, ndikakwira kuUtah, kundovhima. Saka ndakaudzwa kuti kwakanga kune vanhu kumusoro ikoko, kuti murume wandaizovhima naye, akanga ari muteyi wehurumende, “Uye, ndapota hangu, usataura kana chimwe chinhu pamusoro pekunamata, uri paari.” Akati, “Iyeye akanga ari muchinda akaomarara kwazvo.”

³⁹ Ndiyati, zvakanaka, ndakaudza murume wandaifamba naye, ndikati, "Handizotaure nezvazvo."

⁴⁰ Akati, "Musati 'muparidzi.' Kana mukadaro, hamuzomboende kundovhima. Haazomboendi nemi." Akati, "Ndakavhima naye kwemazuva matatu, uye ndairara naye husiku hwega-hwega, ndichidya naye zuva rega-rega, uye haana kana kumboti, 'Mangwanani. Ko makadini? Unoda chekudya here? Suka ndiro.' Kana chinhu!" Akati, "Zvinoka usataura chinhu nezvazvo."

⁴¹ Ndiyati, "Handizotaure kana shoko." Asi handina kumuudza kuti handaizonamata, asi ndakaramba ndichimuudza kuti ndiri... Zvino ndinonamata.

⁴² Saka patakasvika kumusoro ikoko, murume wacho akanga aine hunhu hwakaomarara kwazvo, uye ndaisambofunga kuti aitenda kana chimwe chinhu. Uye akanga achangorasikirwa nemucheche wake husiku hushoma hwanga huchangopfuura, akazvarwa akafa. Saka, takaenda kundovhima. Nezuva repiri, murume wandaivhima naye akanga amuudza, akati ndinowanzovhima kwese-kwese munyika. Saka mumwe muvhimi uya, akanga aneni, paakanga aenda, takanga tiri pamusoro-soro pemakomo; uko kwatakadzinganisa shumba, kusvikira taipinza mumatombo, zvino yakabva yatiza. Saka tainge takagara ipapo takamirira kuti imbwa idzoke. Zvino murume iyeye akati kwandiri, akati, "Mumwe muvhimi uya, shamwari yako, yandiudza kuti unoenda kunovhima kwese-kwese. Une mari yakawanda handiti?" Akati, "Ndinofungidzira kuti hazvinei neni nhai."

⁴³ Ndiyati, "Kwete," ndikati, "haisi mari yakawanda." Ndiyati, "Ndi—ndinobhadharirwa."

⁴⁴ Iye akati, "Oo, ndazviona." Akati, "Zvakanaka, ndinofungidzira kuti hazvinei neni zvakare, asi," akati, "une kambani here inokubhadharira?"

⁴⁵ Anga ava kunyatsozvibuditsa kubva mandiri. Ndakanga ndavimbisa kuti handaizombotaura, munoono. Saka ndakati, hongu, ndikati, "Kwete, changamire. Ndiri muparidzi, mumishinari."

Akati, "Chii chacho?"

⁴⁶ Ndiyati, "Mumishinari." Ipapo akangomira akanditarisa kwemaminitsi mashoma.

⁴⁷ Ndiyati, "Une tariro here yeHupenyu hwemberi shure kwehuno? Tariro yako ndeyeyi?"

Akati, "Ndiri muJack Mormon."

Uye ndikati, "Chii chacho?"

Akati, "MuJack Mormon."

Ndiyati, "Imhando ipi iyoyo?"

⁴⁸ Akati, “Uyo anotuka nekunwa kofi, nekuputa midzanga.”

Ndikati, “Zvakanaka, kupupura kwakatendeka kwakanakira moyo.”

⁴⁹ Ipapo akati—akati, “Ndinoda kukubvunza chimwe chinhu.” Akati, “Ndakaudzwa kuti kereke yechiMormon ndiyo yega kereke yechokwadi iripo.” Akati, “Unozvitenda here?”

⁵⁰ Ndikati, “Kana zviri zvekereke, ndinofunga kuti yakangofanana nedzimwe dzese. Ndinongoziva Chokwadi chimwe chete, uye ndiJesu Kristu.” Ndikati, “Ndinoziva kuti NdeweChokwadi.”

⁵¹ “Zvakanaka,” akati, “Ndine mwana akazvarwa humwe husiku, akazvarwa akafa.” Akati, “Ndakaudzwa kuti mwana iyeye, nekuti akafira mudumbu, Mwari haana kumbofemera mweya wehupenyu maari, zvokuti handizomuone zvakare.” Akati, “Unofungei nezvazvo?”

⁵² “Haiwa,” ndakati, “Hauzombomuone kana uri muJack Mormon, zvechokwadi hauzomuone. Ndicho chinhu chechokwadi, hauzombomuoni kana ukangoramba uri muJack Mormon.” Zvino akati... Saizvozvo, anga ari kundisunda, saka ndakamusundidzirawo shure zvishoma, munona. Takava—kava nenguva yekumbosundidzira shure. Saka akati—akati... Ndakati, “Chii chiri kunetsa?”

Akati, “Oo, handizive.” Zvino akati, “Saka, unofungei?”

Ndikati, “Ndinozivana nevakawanda vakanaka...”

⁵³ Ndakanga ndisingazine kuti akanga ari muMormon. Uye ndakanga ndiri kwazvo... Ndinoziva, nokuti maive muUtah, kuda zvaive zviri izvo, asi ini... nekuti vanhu vazhinji kumusoro ikoko maMormon, kwakapoteredza Salt Lake City. Iyi yaisava Salt Lake City, zvisinei hazvo. Saka ndakafunga, “Zvakanaka, ndakamboita shamwari dzakanaka maMormon, dzakambenge dziri mumitsara yekunamatirwa, vanhu vakanaka.”

⁵⁴ Zvino ndikati, “Ndakambosangana nevarume vakanaka chaizvo vari—vari maMormon.” Iye akati, zvakanaka, ndokuti... Ndikati, “Handizive dzidziso yavo pamusoro peizvozvo, handingade kutaura zvinopesana nedzidziso yavo, nekuti ndizvo zvauri, uye izvozvo ndinozviremekedza zvikuru.” Zvino ndikati, “Saka, uye iwe unoziitenda izvozvo?”

Akati, “Hongu, changamire, ndinodaro. Asi,” akati, “handirarame kusvika pazviri.”

⁵⁵ Ndikati, “Zvakanaka, ndinotenda kuti Bhaibheri rinodzidzisa kuti Mwari akaziva mwana iyeye, mamiriyoni emakore akapfuura, nyika isati yavambwa.” Ndikati, “Mwari akaudza Jeremia kuti, ‘Usati watomboumbwa mudumbu raamai vako, usati watombobuda kubva mudumbu, Ndakakuziva, ndikakuchenesa, ndikakugadza kuva muporofita wemarudzi.’” Ndikati, “Ndiko kaziviro kaAita nezvazvo, unoona.”

Akati, "Zvakanaka," akati, "mazviita."

⁵⁶ Akatanga kufamba achidzika zasi kwechikomo. Ipapo akasangana nemumwe muchinda uya, akati, "Sei usina kundiudza kuti muchinda uyo muparidzi?" Saka taka... Akataura naye zvishoma akatanga kumuudza nezvemisangano.

⁵⁷ Zvino, maMormon anotenda chiporofita. Handi... panogona kunge pasina mumwe wavo pano, asi vano—asi vanotenda mu—muchiporofita. Asi, saka, zvimwe ndiri kutaura zvandisingafanire kunge ndichitaura, asi ini... Hongu. Hongu. Asi, zvisinei, vanotenda.

⁵⁸ Zvino akati, akadzoka kwandiri, akati, "Ndinonzwisia kuti uri muporofita."

⁵⁹ Ndikati, "Kwete, changamire." Ndikati, "Ini... Ishe vakandiratidza zvinhu zvishoma zvichazoitika."

⁶⁰ Akabva asimuka achienda, pakare ipapo, akati, "Ngatipindei." Zvino akapinda mumotokari yake, akadzika kune... kaguta kake kadiki uko kwaagara. Munguva diki, akanga asisipo. Isu tanga tiri kugadzirira imbwa, kuti tizovhima zvakare tichingopedza kusvusvura kwemasikati. Zvino patakazviita, saka, akaenda nemota.

⁶¹ Mushure mekanguvana, mumwe murume wechidiki airatidzika zvakanaka akadzoka, ane makore angangoita gumi nemanomwe, murume kwaye Mukristu airatidzika kuve nohutsvene chaihwo. Akati, "Uyu mukoma wangu." Akati, "Haasi muJack Mormon. Asi muMormon chaiye-chaiye."

Ndikati, "Wakadini, mwanakomana?"

⁶² Zvino iye akati, "Ndinonzwisia, nokuti mukoma wangu andiudza, kuti muri muporofita."

⁶³ Ndikati, "Kwete, changamire." Ndikati, "Hakusi kuti ndiri muporofita." Ndikati, "Ishe vakandiratidza zvinhu zvichazoitika."

⁶⁴ Akati, "Ndabaiwa jekiseni paruoko rwangu izvezvi, ndinofanirwa kunge ndiri patafura yekuoparetwa." Akati, "Asi mukoma wangu andiudza izvi. Ndikati, 'Kana zviri izvo, handichisina basa neoparesheni yacho.'" Akanditarisa akananga mumaziso chaimo, kamutarisiro kakatendeseka, kechokwadi, kakaperera, akati, "Imi isai maoko enyu pamusoro pangu. Kana zvinhu izvi zviri izvo, handizode kuoparetwa." Akaenda kumba apora.

⁶⁵ Hama iyi, shamwari yangu Mukristu, aivhima nen, wekuPhoenix. Akati kwandiri, akati... Vamwe vevakomana ava vakagara muno izvozvi. Mumwe wavo ndinoziva kuti atori pano. Takaenda kumba. Akati, "Hama Branham, kana Ishe akakuratidzai chiratidzo uye okutenderai kuti muudze maMormon zviri kuzoitika, ndizvo zvinobva zvazviita, nokuti vari kuzvitarisira."

⁶⁶ Saka, ndakanamata ndikanamatazve. Zvino ndiri munzira yangu kudzokera kumba, ndaive ndiri kukwira, Muvhuro waitevera, Svondo, nenguva dzinenge ten o'clock, ndainge ndakamira mumba, mushure meshumiro mangwanani iwayo, uye ndainge ndakatarisa panze.

⁶⁷ Ipapo ndakaona chiedza chaivaima-vaima, kanawo imwe mhando yemwenje yaivaima. Zvino ndakaona shumba yakanga iri mumuti, uye—uye yakanga iri dikisa kwandiri kuti ndiipfure. Ndaisaida. Pane mumwe munhu akaipfura, uye, paakaipfura, akaipfura nepfuti yakakurisa. Zvakaibvarura-bvarura shumba iyoyo. Handina kufarira ma—ma—maitirwo azvakaitwa.

⁶⁸ Pandakasvika kuPhoenix, ndakazviudza Hama Dawson, naHama Mosley. Ndinoziva vari pano. Ndakavaona rimwe zuva, pane imwe nzvimbo pano. Uye vaienda kumusoro nen, ivo nemudzimai wavo. Zvino ndikati, "Imi tarisai muone, iZVANZI NAJEHOVHA. Zvichaitika saizvozvo."

⁶⁹ Usiku hwakawanda takamirira, usiku huna kana hushanu, takanga tavrhma, kana mazuva. Kashoma kuti ukwidze shumba mumuti husiku. Zvakaitika kuti, tichiuya kumba, vakasunungura imbwa, muvhimi uyu, mukomana uyu wechiMormon. Uye shu—shumba yakawana muhwezva, kana kuti imbwa yakawana muhwezva weshumba yacho, waro, dzikaikwidza mumuti. Zvino naten o'clock manheru vakauya, vakatimutsa takarara. Tikabva taendako, zvino panga pane shumba iyoyo chaiyo iri mumuti. Vachipenyesa zviedza, Hama Mosley vakaipfura nepfuti yemuromo unenge forty-four calibre, zvakapotса zvaputitsa shumba iyoyo nepakati. Heinoi iyo pano, chaizvoizvo semataurirwo azvakanga zvaitwa.

⁷⁰ Zuva rakatevera, ndakasangana nemukuru wevanochengeta mhuka wemudunhu, mumwezve muJack Mormon. Ndokutora vakomana ivavo pamwe chete, ndikavatungamirira kudzokera kumusha kuna Kristu.

⁷¹ Ndinokuudzai kuti, ndiYe mumwe chete zuro, nhasi, nekusingaperi. Mwari anoratidza Shoko raKe kuti rakadaro.

⁷² Makambonzwa vanhu vachiti, "Kuona ndiko kutenda." Hazvisi zvese chokwadi. Vanhu vazhinji vanoona asi zvakadaro havatende.

⁷³ Mazuva Jesu paaiva panyika, sei vasina kuMucherechedza, kuti Akanga ari Shoko raMwari raratidzwa? Sei vanhu vasina kuziva kuti Mosesi akati, "Jehovah Mwari wenyu achasimudza muporofita akafanana nen"? Uye Akazadzisa Shoko rese rakataurwa neBhaibheri kuti Achaita, asi havana kuzvitenda.

⁷⁴ Asi Mwari, muchizvarwa chega-chege, akaratidza kuti Shoko raKe nderechokwadi. Anogara achiratidza Shoko raKe. Zvino vanotaura dzimwe nguva, kuti, "Kuona ndiko kutenda" Handizvo. Asi tinoziva kuti Mwari anoenderera mberi achiratidza Shoko raKe muzera rega-rega.

⁷⁵ Tinoziva kuti Akariratidza kuna Adhama naEvha, kuti paAkati, "Nezuba ramunodya, nezuba iroro muchafa zvirokzwazvo." Tinofanira kubvuma kuti, izvozvo ndicho chokwadi. Tinozvitenda, nekuti Akazviratidza kwatiri, uye tinoziva kuti ndicho chokwadi.

⁷⁶ Zvino tichatora dzimwe nzvimbo idzo Mwari dzaakaratidza Shoko raKe. Ngatitorei, semuenzaniso, mumazuva a—aNoa. Mwari akataurira Noa mharidzo yakanga isingaenderane nezvesainzi uye isingatendeke. Hapana munhu aigona kunge akatenda. Kwakanga kusati kwambonaya panyika. Zvaisaenderana nesainzi!

⁷⁷ Zvichida rakanga riri zera rakakura mune zvesainzi panguva iyoyo pane zvatiri zvino, nekuti vakavaka mapiramidhi nemaspinx, nezvakadaro, mumazuva iwayo, zvatisingakwanise kuvaka zvino. Vakanga vaine ruzivo rwerimwe simba, imwe mhando yerimwe simba remichina, zvichida reatomiki kana rimwewo, zvokuti vaigona kusimudza mazitombo akakura kwazvo iwayo, zvatisingakwanise kuita nhasi. Asi vakaita zvinhu zvikuru zvesainzi. Vakanga vane chimwe chinhu chekuti vaikwanisa kuomesa chitunha, voita kuti chiratidzike sechipenyu kwemazana emakore. Takarasikirwa nehunyanzvi ihwohwo.

⁷⁸ Jesu akati, "Sezvazvakanga zvakaita namazuva aNoa, ndizvo zvazvichaitawo namazuva okuuya kweMwanakomana womunhu." Uye tinoziva kuti tava kuzopinda mune rimwezve zera guru resainzi.

⁷⁹ Uye zvino mharidzo yaiva naNoa yaipesana chaizvo nezvaitendwa mumazuva iwayo, mukereke, uye yaipesana kwazvo nezvekunzvera kwesainzi. Asi Mwari akaratidza Shoko raKe kuti nderechokwadi. Mwari akaratidza kuti zvakanga zvataurwa nemuporofita iyeye zvakanga zviri zvechokwadi.

⁸⁰ Zvakare tichatora mumwe kwechinguvana. Abrahama akanga ari mumwe muporofita waShe, uyo Shoko rakauya kwaari. Zvino ndokumuudza, paakange ane makore makumi manomwe nemashanu ekuberekwa, uye Sara akanga ane makore makumi matanhagu nemashanu ekuberekwa, kuti aizova nemwana naSara. Zvino, izvi zvaikatyamadza kumunhu asingatendi. Mungazvifungidzira here, nhasi uno, chinhu chakadaro chichiitika kunyange muzuva ranhasi, nebudiriro yese yatinayo mune zvesainzi, uye nevana vese ava vekusanganisira mutumabhotoro vavanotaura nezvavo, nezvakadaro? Asi chembere iyi, yakanga yava nemakore makumi matanhagu nemashanu, nemutana ane makore makumi manomwe nemashanu, asi Shoko raMwari rakauya kuna Abrahama rikamuudza kuti izvi ndizvo zvaizoitika. Zvino Abrahama akatenda Mwari. Zvino, zvisinei nekuti Mwari akataura kakawanda sei, uye nekuti chainge chiri chokwadi sei,

Abrahama aifanirwa kutenda zvakanga zvataurwa naMwari, kuti zviitike. Zvino tarisai kuti murume uyu akaedzwa sei, nechapupu chake, chaakatenda.

⁸¹ Murume mumwe chete iyeye akapupura kudaro, kuti akatenda Mwari, munhuwo akangoita sezvauri, wakagara pano manheru ano. Tichiri kungotenda Mwari. Tinofanira kutenda kuti Shoko raKe ndereChokwadi. Uye Anozoriratidza, kuti Iro ndereChokwadi, kana tikangoritenda chete.

⁸² Zvino tarisai chipingaidzo chakanga china Abrahama. Chekutanga chakanga chiru zera rake, makore makumi manomwe nemashanu, uye Sara aine makore makumi matanhatu nemashanu. Akanga atopfuura nekure shanduko yeupenyu, nguva yekuguma kubereka. Pasina kupokana asi kwakange kwamira, makore mazhinji akanga apfuura. Akanga ararama naye semudzimai wake. Akanga ari hanzvadzi yake kudivi rababa, pamwe akanga amutora ari musikana achangobva zera, ndokumuroora. Uye akanga asina kumboita mwana. Akanga asingaberekwi zvachose. Zvino tinoona kuti, kuti azviiite, aifanira kuzvipatsanura kubva kuvanhu vese vaisazvitenda, kuitira kuti aite kuti zviitike.

⁸³ Handireve kuti munofanira kuzvipatsanura kubva kuvanhu. Asi munofanira kuzvipatsanura kubva kumakuhwa ese ekusatenda, zvino mogarira kure naizvozvo. Kana vanhu vachiti, "Ah, zvinhu izvozvo hazviitike! Iboka revanhu vanopenga! Hakuna chinhu chakadaro seichocho chiru kuitika," chingovhara nzeve dzako wofamba uchienda. Musambopira nzeve kwazviri.

⁸⁴ Bhaibheri rakataura kuti "Abrahama haana kudzedzereka pavimbiso yaMwari, kubudikidza nekusatenda; asi akanga akasimba, achipa kurumbidza kuna Mwari." Zita rake rakashandurwa kubva pakuti Abramu kuenda kuna Abrahama, kushandurwa kwezita kwakaita zita rake, "baba vamarudzi." Mungazifungidzirawo here kuti murume achigara nemudzimai wake, mudiwa wake, waakanga agara naye kwemakore ese aya, uye zvino ava kumakore anosvika makumi masere ekuberekwa, uye mudzimai wake ane makore makumi manomwe, asi zvakadaro pasina kana mwana mumwe chete kana tarisiro yemwana, asi aizviti "baba vamarudzi." Mungafungidzira here tsoropodzo dzevamwe varume vekwake pavaipfuura vachiti, "Baba vamarudzi, zvino wawa nevana vangani panguva ino?" Nekutsoropodzwa kwese kwaafanira kupindana nemakuri!

⁸⁵ Asi Abrahama haana kutombodzedzereka zvachose, nekusatenda. Aitenda kuti Mwari aikwanisa kuita izvo zvaAkanga avimbisa, kuti Mwari aizoratidza Shoko raKe, zvisinei kuti zvatora nguva yakareba sei. Asi kunze kwekuti ange achiperi simba nguva yese, sezvatisingatane kuita, airamba achitosimba nguva dzese. "Kana zvisina kuitika nhasi, mangwana chinenge chava chishamiso chikuru, nekuti chinenge

chakura nezuba rimwe chete.” Akanga ari Mwari, akanga ari Mwari muna Abrahama, nekuti aiziva kuti Mwari akaratidza maShoko aKe ese kuva saizvozvo.

⁸⁶ Kana vana vaKe vakangotora chete Shoko raKe, kuti Agone kuRiratidza kubudikidza newe! Ndiyo nzira chete yaAnogona kuratidza Shoko raKe.

⁸⁷ HaaRiratidze kuvanhu vasingatendi. Havagone kuratidzwa; ivo havatendi. Asi, haRisi revasingatendi. Harisi revasingatendi.

⁸⁸ Ndere uyo anotenda. Uye kana Akawana mumwe munhu anozotenda Shoko raKe, Anozoratidza Shoko raKe newe. Uye dzimwe nguva hurwere nezvime zvinoitika kwatiri nenzira iyoyo, kuti Mwari azviratidze pachaKe.

⁸⁹ Munorangarira here murume bofu akawanikwa naJesu? Vakati, “Ndiyani akatadza, iye here kana baba vake, amai vake?”

⁹⁰ Akati, “Panyaya iyi, hapana, asi kuti mabasa aMwari agone kuziviswa.” Munoona, zvakaitika kumukomana iyeye kuitira kuti Jesu akudzwe. Dzimwe nguva hurwere hachisi chituko, asi iropafadzo, kuti tiburitse kutenda kwedu kunze uye todana izvo zvinhu zvisipo, sezviripo. Mwari akataura kudaro, uye Achazviratidza kuti ndizvo kana ukasazongoshaya simba chete uri pasi pekuedzwa.

⁹¹ Aigona kuratidza Jobho, imwe nguva, kuti haaikwanisa kuMutuka pamberi paKe. Tarisai muedzo uyo Jobho akapfuura nemauri. Asi ari zasi mumukanwa werufu, asi zvakadaro akati, “Ishe akapa, Ishe atora, Zita raShe ngarirumbidzwe!” Akazvitenda zvechokwadi. Mwari akaratidza Shoko raKe kuna Jobho. Akariratidza kuna Abrahama. Akariratidza zvakadaro.

⁹² Zvakare Akariratidza kubudikidza naMosesi. Zvino Mosesi, pazvakanga zvakanyatsomuomera, Mosesi akanga anazvo mupfungwa dzake, kuti zvichida, aizova mudzikinuri, kuti zvime amai vake vakanga vamuudza kuti akazvarwa ari mwana akanaka. Ivo—ivo vakanga vari mudzidzisi wake vakamukudza ari mumuzinda waFarao, pasina kupokana vanga vakamuudza, “Mwanangu, takanamata kuti tizodzikinurwa, uye tinotenda kuti iwe ndiwe mwana uyo Mwari waachashandisa kudzikinura.” Uye ipapo paaka...

⁹³ Munoona, akauya uye aifanira kuzova mwa—mwanakomana wemukunda waFarao, uye tinoona kuti ndiye aizova mugari wenhaka yechigaro choushe. Handiti, pasina kupokana zvakanga zviri mupfungwa dzavo panguva iyoyo, kuti aizova Farao aitevera, “Uye ndiwo madzikinuro aaizoita vanhu, nekuva Farao aitevera.” Asi Mwari akanga ane... Kana dai zvanga zvakadaro, ipapo angadai akazviita kubudikidza nezvinobatika, kubudikidza ne—ne—nekuita kwezvematongerwo enyika. Asi Mwari haashande nguva dzose saizvozvo.

⁹⁴ Mwari ane nzira dzemashandiro aKe, uye Akati Achazo “vaburitsa.” Akaudza Abrahama, “Kwapera makore mazana mana,” kuti Aizo “vaburitsa, neruoko rwune simba,” Aizo “ratidza zviratidzo nezvishamiso.” Saka aisakwanisa kuita saizvozvo, saka Abra-...Tinoona kuti Abrahama akatenda Mwari, uye hepano Mosesi zvino achitenda Mwari.

⁹⁵ Mosesi akatarisa panze nepafafitera rimwe chete zvaitwa naFarao, akaona vanhu vamwe chete. Avo Farao vaaiona, sekunge, “Vanhу vakatukwa, vanhu vakanga vasina chinhу asi boka revanopfuurira mwero, kuna Mwari, uye mumwe Mwari werenje kune imwe nzvimbo wavaisaziva nezvaKe; chinhу chisingaonekwe chavanonamata kwachiri, zvokuti pakanga pasina zviripo pachiri. Iboka revapengereki. Uye rakanga riri boka renhapwa. Uye Mwari wavo achivasiya vari nhapwa, zvichiratidza kuti Akanga asiri Mwari.”

⁹⁶ Zvino pakati pazvose izvozvo, Aisimudza munhu wacho chaiye. Mwari anoita zvinhu nenzira dzakadaro dzisinganzwisisike, pasi pavo chaipo. Kwete akadzidza bhaibheri, kwete mudzidzisi, kwete muprisita, kwete mumwe wevarume vavo vatsvene; asi angori munhu wamazuva ose, akazvarirwa basa iroro. Mwari akamudana kuva muporofita waKe, zvino ndokumutuma zasi ikoko. Uye asina chinhу muruoko rwake kunze kwetsvimbо yakakombama, kundosangana nemauto, ane zvombo zvakaisvogadzirwa zvakanga zvakunda pasi rose. Asi aine chimuti ichocco muruoko rwake, sezvaakaudzwa naMwari kubata tsvimbo iyoyo muruoko rwake uye kuti aizodzikinura Israeri, uye akadzikako akazviita nekuti Mwari akanga azvivimbisa. Ko achazviita sei? “Ndichange ndinewe.”

⁹⁷ Akati, “Ndiratidzei kubwinya kweNyu, Ishe. Ndinokakama. Handigone kutaura zvakanaka. Ndino...” Akanga ane mamirioni ezvikonzero zvokuramba.

⁹⁸ Asi Akati, “Ndichange ndinewe.” Ndizvo zvega zvazvakatora. Akaenda, achitora Shoko raMwari. Zvisinei nekuti basa racho rairatidzika zvine njodzi sei, Mosesi akaramba achitenda Mwari. Uye Mwari akaratidza Shoko raKe, kubudikidza naMosesi, kuti ichokwadi. Nekuti, zvisinei nekuti chii chakaitika, Mosesi akaramba ane Shoko iroro. Munguva yerwendo... .

⁹⁹ Mwari akavaudza, vari muEgipita, zvakare, kuti Achavadvakinura, “Kuenda kunyika yechipikirwa, nyika yakanaka, yakazara nemukaka neuchi.” Uye yakanga iriko zvechokwadi. Vaisaziva kuti yaivako, asi Akati, “Iriko, uye Ndaipa kwamuri. Yatova yenu nechekare, chingoendai muniorita!”

¹⁰⁰ Zvino imo murenje, apo vazhinji vavo pavakabuda, vachitamba muMweya, paya Miriami paairidza tamborini;

vachidya mana yaibva Kudenga; vakaterera Mosesi achiimba ari muMweya; vachiona mashura nezviratidzo zvichiitika. Asi pazvakasvika pamangange, ekutenda Shoko rese raMwari, vimbiso dzese, vakakundikana.

¹⁰¹ Vaviri vavo chete ndivo vakazvitenda, vanga vari Joshua naKarebhu. Uye vakadzoka neumboo hwekuti nyika yacho yakanga yakanaka.

¹⁰² Asi, mamiriro ezvinhu anga aripo, ndiwo akava chidziviso kwavari. Nekuti, vakati, "Hatigone kutora nyika iyoyo, nekuti maguta avo ane masvingo, va—va—vatumwa vavo ikoko. Kwete vatumwa vavo, asi va—vanhu vavo ihofori. Tingatoti, tinoita semhashu, tiri padivi pavo."

¹⁰³ Joshua naKarebhu vakati, "Tinokwanisa nekupfuirisa kuitora." Sei? Mwari akanga aipa kwavari, zvisinei nekuti hofori idzodzo dzakanga dzakakura sei. Chimhingamupinyi hachina zvachaireva kwavari. Mwari akanga ataura kudaro! Uye Mwari akazviratidza kubudikidza navo. Uye vakaendako vakanotora nyika yacho, sezvakanga zvataurwa naMwari kuti vachaita. Akazviratidza kwavari.

¹⁰⁴ Zvino, pavakasvika mumwedzi waKubvumbi, apo mvura yaiyerera zvakasimba ichidzika kubva mumakomo, kubva kuchando chaikukurwa, nezvakadaro, zvairatidzika sekunge Mwari akanga ari mutungamiri wehondo aisaziva zvaaiita, kutungamira mauto aKe kusvika kunzvimbio, Akanga availta kuti vavharirwe kunze kwenyika yechipikirwa. Uye nguva yacho yaAkavayambutsa, yaaizovayambutsa, wanga uri mwedzi wakaipisia wegore. Mwedzi uyo Jorodhani paraipfachukira nekumahombekombe kwaro, ichiyerera kunze nemuminda. Handiti, kana vaizovayambutsa, maizova munguva yezhizha, apo pavaizogona kuyambuka vachifamba nemumyura. Asi Akamirira kusvika mvura dzava kunyudza. Anofarira kuratidza kuti Iye ndiMwari. Anofarira kuratidza Shoko raKe, zvisinei.

¹⁰⁵ Usaita basa nekuti chiremba vati, "Wava kufa nekenza." Ndizvo zvega munhu wacho zvaanoziva. Zvichida mvura dzava kunyudza kune vamwe venyu, manheru ano. Asi, rangarirai, Mwari akaita vimbiso. Mwari anochengeta Shoko raKe, uye Mwari anoratidza Shoko raKe. IChokwadi.

¹⁰⁶ Akamirira kusvikira mvura yazara madhaka, kusvikira yava kunyudza yava kuvhara misoro yavo, nezvakadaro, ipapo Akavhura nzira. Akaenda pamberi pavo akagadzira nzira.

¹⁰⁷ Ko vachapinda sei, paJeriko, apo yanga yakavharwa yese? Joshua aisaziva. Aiziva kuti Mwari akanga amutungamirira kusvika ipapo, nhanho yaitevera ndeyaMwari.

¹⁰⁸ Rimwe zuva, paanga ari kunze achifamba achitenderera, achiona masvingo, akawona Murume akamira akabuditsa munondo waKe. Akavhomora munondo wake akaenda

kunosangana neMurume iyeye, akati, “Uri Wekwaani? Ko Uri mumwe wedu here kana kuti Uri wevavengi vedu?”

¹⁰⁹ Akati, “Ndiri Mukuru wehondo yaJehovah.” Uye Akamuudza zvekuita. Ko aizoridza hwamanda sei rusvingo rwodonha pasi, urwo rwavaigona kumhanyisa ngoro mumijawe pamusoro parwo? Zvaiva nechekuita chei nehwamanda?

¹¹⁰ Mwari anoshandisa nzira nyoro dzakadaro. Ndizvo, kuva zvinyoro kwazvo, ndizvo zvinoita kuti zvive Mwari kwandiri. Tinogara tichiedza kutsvaga chimwe chinhu chihombe, kuti chiru kuzoita chimwe chinhu, uye Mwari... rimwe sangano hombe richatora nyaya yacho yose roipedza yose. Apo, Mwari anotora munhu munyoro, angori munhu mumwe chete waAnogona kubata mumaoko aKe, uye Ozoratidza Shoko rese raAkataura, naYo. Zvinotora nzira diki dziri nyore!

¹¹¹ “Ridzai hwamanda.” Kwete kuti cherai rusvingo, asi, “Chingoridzai hwamanda, ipapo masvingo achawira pasi. Ruzha rwehwamanda rwuchawisira rusvingo pasi.” Hupenzi hwakadini kupfungwa yenyama! Asi Mwari akaratidza kuti Shoko raKe raive rechokwadi, nekuti masvingo akadonhera pasi, rwumwe pamusoro perwumwe. Vakabva vangopindamo naipapo vakatora guta.

¹¹² Oo, Mwari anofarira kuzviratidza pachaKe kuti ndiMwari! Joshua aizviziva izvozvo. Rimwe zuva, paakanga akamira ipapo, rimwe nenji gurusa rati ramboitika, kunze kwerufu, kuvigwa, nekumuka kwajesu Kristu. Apo muvengi... Akanga avakunda, uye mauto akasiyana akanga ari mumakomo. Akanga avavhurumutsa, zuva rakanga rava kudoka. Oo, ini zvangu, yakanga iri nguva yakadii kuMukuru wehondo Joshua!

¹¹³ Rangarirai, akarwisa nyika iyoyo yose, asina kana chipatara, mukoti, boka revabatsiri yokutanga, kana murume akakuvara. Ndiudze chinhu chingakunda izvozvo. Hongu, changamire. Akanga asina zvipatara, asina vanamukoti, uye haana kumborasikirwa nemurume mumwe chete zvake, chero bedzi vaingofamba mukuda pamwe neShoko raShe. Mwari akaratidza kuti Akanga anavo. Ndizvo chaizvo. Cherechedzai zvino.

¹¹⁴ Uye tinoona kuti Joshua aiziva, kuti kana husiku hukasvika, vaizoverevedza vobatana pamwe chete, uye—uye vozviunganidza voita mamwe mauto makuru, uye aizova nenguva yakaomarara navo zuva raitevera. Aisaziva zvekuita, saka akatarisa kumusoro kuna Mwari. Aida betsero, uye aida kuti zuva rimire. Saka akangoraira zuva iroro kuti rimire, uye... akati “kumwedzi umire paAjaroni,” kuti usafamba kusvikira auraira. Mwedzi nezuva zvikamira zvakadaro kwemaawa makumi maviri nemana, apo Joshua akarwa hondo akakunda muvengi, nokuti akanga ari mugwara rebasa chairo. Akanga ane kodzero yekuzviita, nekuti aiterera murairo waMwari.

¹¹⁵ Kana ungori bedzi mugwara rebasa, uchichengetedza Shoko raMwari, uchiita izvo zvaAkakuudza kuti uite, uchifamba nekuraira kwaMwari, une kodzero yekuti kugomo iro, "Ibva!"

¹¹⁶ Mwari anochengetedza Shoko raKe. "Kana ukati kugomo iri, 'Ibva,' ukasapokana mumoyo mako, asi wotenda kuti zvawataura zvichaitika, unozova nezvaunenge wataura." Jesu akazvitala, muna Mutsvene Mako 11:22. Ndicho Chokwadi. Ndinoziva kuti iChokwadi. IShoko raMwari, uye zvinoratidza kuti iChokwadi. Tinongotya chete dzimwe nguva. Tinosvika pokuti, tinotya kuti haAzochengeti Shoko iroro. Anochengeta Shoko iroro. Akatala kuti Anozviita. Zvino, tinoona kuti ichokwadi. Akazviratidza.

¹¹⁷ Chiporofita chaIsaya, imwe nguva, chaise chinhu chakange chisati chamboitika; chakange chisati chamboitika kumashure, uye hachisati kubva ipapo. Akati, "Mhandara ichabata mimba." Mungazvifungewo here kuti mudzimai, asina kuziva murume, angave nemwana? Isaya akati, "Mhandara ichabata mimba."

¹¹⁸ Mwari akakonzeresa kuti mhandara ibate pamuviri, kuti aratidze kuti Shoko raKe nderechokwadi. Akaratidza Shoko raKe, nekuti mhandara yakabata mimba ikabereka Mwanakomana.

¹¹⁹ Zvino, Shoko iroro raitwa nyama, tarisai muone zvaRakaita. Zvino Mwanakomana paakanya, Akanga ari Shoko pachaKe. "Pakutanga Shoko rakanga riripo, uye Shoko rakanga riri kuna Mwari, uye Shoko rakanga riri Mwari. Zvino Shoko rakazova nyama rikagara pakati pedu."

¹²⁰ Akanga ari Shoko riya rinorarama. Akaratidza kuti Akanga ari Shoko rinorarama. Akati kuvadzidzisi vezuva iroro, "Ndiani angaNdipomera chivi?" *Chivi* "kusatenda." "Ndiani angaNdidiudza kuti haNdisi mutendi? Shoko rese rakanyorwa pamusoro paNgu, rakazadzikiswa." Zvakafanotaurwa zvinomwe zvekupedzisira zveupenyu hwaKe zvakazadzikiswa mumaawa manomwe ekupedzisira, pamuchinjikwa. Zvese zvakanyorwa nezvaKe, zvakazadzikiswa, nekuti Akanga ari Shoko. Akaratidza kuti Iye aive, ari. Akapodza vanorwara. Akamutsa vakafa. Akakunda rufu, gehena, neguva. Akaratidza kuti Akanga ari Shoko.

¹²¹ Cherechedzai nyaya iyi pano pamba paJairosi. Akanga ari... Akanga avaudza chokwadi. TinoMuona Achiyambuka gungwa. Obva apinda.

¹²² Pakanga pane mudzimai mudiki pamusoro pechikomo, akanga apedzera mari yake yose kuna vanachiremba. Hazvina mubvunzo, vanachiremba vakanga vaita zvese zvavaiziva kuita, kuti mudzimai apore; zvimwe vanaChiremba vechiHebheru, uye uyu anga ari mudzimai wechiHebheru, saka vakanga vaita zvese zvavaigona kuitira hanzvadzi yavo. Kunyange zvakadaro, vanga vasina chekumisa nacho dambudziko rekubuda kweropa

iri, ranga riri, zvime, nguva yeshanduko yehupenyu uye ropa rake rakanga rayerera kusvikira iye...akanga asisina kana simba zvekuti akanga asingachagone kufamba zvachose. Zvino akanga anzwa nezvaJesu. Zvino paakaona kaigwa kadiki kachisundirwa mumikonachando, akaendako zasi kunoona kuti chakanga chiri chii.

¹²³ Vatsoropodzi vaKe vazhinji vakanga vakamira ipapo. Uye haAshaye vatsoropodzi nhasi. Dai vakaziva kuti Akanga Ari ani, vangadai vasina kumbova vatsoropodzi vaKe. Asi vakanga vari vatsoropodzi vaKe nekuti vaisaziva kuti Akanga Ari ani.

¹²⁴ Ndozvazviriwo neMharidzo muzuva ranhasi, varume nevakadzi vazhinji vakana vanotsoropodza iZvi nekuti havazive kuti Iyo chii.

¹²⁵ Jesu akati, “Kana dai makaziva Mosesi, mungadai makaNdiziva. Mosesi akataura nezvaNgu. Varume vazhinji vane mukurumbira vaishuva kuona zuva rino. Kana Ndisingaita mabasa aBaba vaNgu, musaNditenda. Ndine chapupu chikuru,” Akati, “kupfuura chaJohane, nekuti mabasa aNdinoita, anoratidza kuti Baba vaneNi.” Akanga ane mabasa makuru anodarika, nekuti Akanga ari Nyakuziviswa. Johane akanga achiratidzwawo zvakare, sezwi rounodana murenje. Asi paAkuya, Akanga ari muporofita uyo Mosesi waakataura nezvake kuti achasimudzwa.

¹²⁶ Sezvandakataura husiku huya, Akauya ari mumazita matatu; muzita reMwanakomana waMwari, Mwanakomana wemunhu, uye neMwanakomana waDhavhidhi.

¹²⁷ PaAkanga ari pano panyika, kekutanga, Akanga ari Mwanakomana wemunhu. Aisakwanisa kuva Mwanakomana waMwari ipapo; haAna kumbozviti ndiye. Akati Akanga ari “Mwanakomana wemunhu.” Chero munhu wese paaiMubvunza, Aiti, “Munoona Mwanakomana wemunhu; Mwanakomana wemunhu.” Zvino, “Mwanakomana wemunhu” *muporofita*. Aifanira kuuya nenzira iyoyo, nekuti, Gwaro, Iye haagone kuuya zvinopesana neGwaro.

¹²⁸ Ndokusaka, nhasi, kuti Mharidzo yedu—yedu yenguva ino haigone kuuya kubudikidza nevakadzidza bhaibheri nedzidzo yebhaibheri, inofanira kudzokera kune icho chinhu chayakavimbisa kuzoita. Inofanira kudaro.

¹²⁹ Saka tinoona kuti, muMurume uyu, Aifanira kuva muporofita. Kwete Mwanakomana waMwari ipapo, Aifanira kuva Mwanakomana wemunhu. Jehovha pachaKe akadana vaporofita, Jeremia nevamwe kuti, “Mwanakomana wemunhu.” “Kana moona Mwanakomana wemunhu...” “Ndianiko Mwanakomana wemunhu?” vairamba vachivunza.

¹³⁰ Ipapo, Akashumira hofisi yaKe seMwanakomana wemunhu. Zvino Ava kushumira hofisi yaKe iye zvino seMwanakomana waMwari. Mwari Mweya, uye zvino Aishumira mamaZera

eKereke, seMwanakomana waMwari. Zvino, muMireniyamu, Achange ari Mwanakomana waDhavhidhi, paAnenge agara pachigaro chaDhavhidhi. Achagara nhaka yepachigaro choushe, Mwanakomana waDhavhidhi. Mwanakomana wemunhu, Mwanakomana waMwari, Mwanakomana waDhavhidhi, uye Munhu mumwe chete nguva yose.

¹³¹ SaBaba, Mwanakomana, neMweya Mutsvene; hofisi yaMwari. Akanga ari Mwari Baba, zvino Akazova Mwari Mwanakomana, iye zvino Ava Mwari Mweya Mutsvene. Kwete vanaMwari vatatu; Mwari mumwe chete, kuratidzwa kutatu, hunhu hutatu hwaMwari mumwe chete.

¹³² Zvino tinoona, uye munguva ino yatiri kurarama mairi, Mwari anongochengeta Shoko raKe zvimwe chete sezvaAiita kareko.

¹³³ Tinoona kuti Akaya achiyambuka gungwa. Mudzimai uyu akaMutenda, pane chimwe chinhu chaiva maari chakatanga kurova. Akanga asina Gwaro razvo, sezvapaiva pasina Gwaro rekuti Joshua amise zuva, asi akatenda mumoyo make kuti Akanga ari Mwanakomana waMwari. Saka akati, “Kana ndikangobata chete nguwo yaKe, ndichapodzwa.” Saka akazvimanikidzira kupinda nemumhomho kusvikira abata nguwo yaKe, ipapo dambudziko rekubuda ropa rakamira.

¹³⁴ Zvino, Akatarisa kuungano, kuti aone kuti ndiani akanga aMubata. Pasina kupokana, pakanga pane mumwe munhu. Akamira. Vanhu vese vachiMuunganira; vamwe vachiMunyomba, vamwe vachiMuseka; muprisita akamira nechekure achiMubvunzurudza, nevashumiri, nevakadaro. Asi pakanga pane vamwe vaiMutenda. Uye, uye mushure mechinguva Akamira, pakarepo, ndokutendeuka, akati, “Ndiani aNdibata?”

¹³⁵ Vamwe vavo vakati, “Nei, Tenzi!” Ndinotenda kuti akanga ari Petro akati, “Nei, mhomho yese iri kungoKubatai. Sei, ndiani ‘akubatai’ iMi? Handiti, munhu wese ari kuKubatai!”

¹³⁶ Akati, “Asi Ndanzwa kuti simba rabuda maNdiri.” Akanzwa kupera simba. Kainge kari kabatiro kakasiyana.

¹³⁷ Kana dai taigona kungoona izvozvo chete, hama, hanzvadzi! Kana ukakwanisa kuMubata nemabatiro iwayo! Oo, vanhu vanorwara, ndiri kugadzirira kuzokunamatirai, munguva shoma iri kutevera. Ndinotenda kuti ndine Mweya Mutsvene, kwete Mweya Mutsvene wakawanda kupfuura wamunawo kunze ikoko, varume ava wawanawo pano. Mweya Mutsvene mumwe chete, asi murairo waMwari; uye kana ukazvitenda izvozvo kuti murairo waMwari, wekunamatira vanorwara, nekuvaisa maoko pamusoro pavo, nekudzinga mweya yetsvina, nevimbiso dzaAkaita, zvichava zvimwe chetewo kwauri. Uchawana chaunenge wakumbira, kana uchizvitenda.

“Unozvitenda here kuti Ndinogona kuzviita?” Jesu akadaro.

¹³⁸ “Hongu, Ishe, ndinotenda,” akadaro murume akanga ane mwana aiva nepfari, “Ndinotenda kuti ndiMi Mwanakomana waMwari aifanira kuuya panyika.” Zvino, tinoziva kuti zvinongotorwa chete maonero iwayo kuunza zviberekwa.

¹³⁹ Zvino, nekukurumidza, ngatifungei nezvaKe kwechinguvana, heuno Achikwira nenzira yaKe. Muprisita mudiki akauya, pasina kupokana asi muchinda mudiki uyu akanga ari mutendi wepamuganhu.

¹⁴⁰ Pane vazhinji vavo munyika nhasi uno, vatendi vadiki wepamuganhu. Vanoda kutenda Izvozvo. Vanoda kutenda kuti Mweya Mutsvene ndewezechokwadi. Vanoda kutenda kuti uku kufamba kwechiapostora, sezvakavimbiswa naMwari mumazuva ekupedzisira kuti Achadurura Mweya waKe. Isu... iye anoda kutenda muna Maraki 4, yaAkavimbisa, mumazuva ekupedzisira iko—iko Kutenda kwepakutanga kwechipentekosti kuchadzoreredzwa ku—kukereke zvakare.

¹⁴¹ Maraki 4 inotaura izvozvo. “Tarirai, Ndinokutumirai Eria muzuva rekupedzisira,” ndizvo chaizvo, “uye achadzoreredza Kutenda kwevana kune madzibaba zvakare,” munoona, “Kutenda kwemadzibaba kune vana, zvakare.” Munoona, zvinofanira kutodaro.

Unoti, “Zvakanaka, akanga ari Johane Mubhabhatidzi.” Kwete, kwete.

¹⁴² Johane Mubhabhatidzi akanga ari Maraki 3. Ndizvo chaizvo. Mateo 11 inotaura kudaro, “Kana muchigona kuzvigamuchira, uyu ndiye aitaurwa nezvake, ‘Tarirai, ndinotuma nhume yaNgu pamberi paNgu.’” Akanga ari Eria, zvechokwadi. Jesu akataura kuti akanga ari iye. Asi kwete Eria wemuna Maraki 4, zvachose.

¹⁴³ Nekuti, “Pakarepo mushure meMharidzo iyoyo, nyika ichapiswa nemoto, uye vakarurama vachafamba pamusoro pemadota evakaipa.” Saka hazvina kumboitika munguva yaJohane. Tinofanira kuva neMharidzo inodzoka ichitsvaira nesimba yoburitsa vanhu kubva mumamiriro ese aya emasangano, kudzokera kune Kutenda kwechipentekosti kwepakutanga, chaiko. Uye tiri kuona zvichiitwa, kuzadziswa kweGwaro rinofanira kuitika. Magwaro ese anofanira kuzadziswa. Akawanda sei mamwe akadaro atinogona kushandisa, zvinozotora nguva yakareba kupfuura yandinayo pano zvino, kuzviratidza. Asi munonzvisisa zvinhu izvi, kuti zvinofanira kuitika chaizvoizvo zvakadai, kuvana vaAbrahama, sezvaAkavimbisa.

¹⁴⁴ Tinoona Jesu ava kuenda zvino kundopodza kamusikana kadiki aka. Nekuti, baba vacho, mutendi wepamuganhu, chimwe chinhu chakasvika panzvimbo pekuti aifanira kucherechedza Jesu, saka, chiremba akanga amutadzirira. Zvino akapfeka nguwani yake nhema duku akafamba achidzika kuti aone kuti

angawana Jesu here. Munoona, Iye anogara aripo kana wava kuMuda. AkaMuwana achangosvika kumahombekombe.

¹⁴⁵ Zvino kati, “Huyai kumwanasikana wangu mudiki, muise maoko eNyus pamusoro pake, achapora.” Akati, “Arere ava kutotandadza. Ndiye mwana wangu ega.” Akati, “Ane makore gumi nemaviri. Hatina vamwe vana. Mudzimai wangu nen,” pamwe, “tava kuchembera. Zvinoka uyu ndiye ega mwana watinaye, uye arere ava kutotandadza. Ishe, ndinoKutendai. Kana Mukangouya chete mukaisa maoko eNyus pamusoro pake, anopora.”

¹⁴⁶ Munoona, chii chaakacherechedza? Akacherechedza kuti Shoko raMwari rakavimbiswa rairatidzwa muMurume uyu.

¹⁴⁷ Zvimwe chete nezvakataurwa naNikodhimo kuti, “Rabhi, mudzidzisi, tinoziva kuti Muri mudzidzisi akabva kuna Mwari. Tinozviziva. VaFarise vanozviziva.” Sei vasina kuzvipupura? “Hakuna munhu anogona kuita zvinhu izvo zvaMunoita, kunze kwekunge Mwari anaYe. Tinozviziva kuti Makabva kuna Mwari.”

¹⁴⁸ Pano tinoona kuti Jairosi waitenda zvimwe chetezvo. Akati, “Huyai muise ruoko rweNyus pamusoro.” Aiziva kuti Mwari akanga ari maAri. “Isai maoko eNyus pamusoro pemwana wangu. Kunyange ave kutofa, achararama.”

¹⁴⁹ Akangofamba achienda pamwe chete naye. Paakanga achienda, ipapo pakauya munhu achimhanya, akati, “MusaMunetsa, musaramba muchinetsa Tenzi zvakare. Mu—musikana, afa, atoenda zvino. Ashaika.”

¹⁵⁰ Jesu akatendeukira kuna Jairosi, akati, “HaNdina here kuti kwauri, ‘Kana ukangotenda chete, uchaona kubwinya kwaMwari?’ Kana ukangozvitenda chete!”

¹⁵¹ Akapinda mumba, zvino havano vaive varimo, vese vachiungudza nekuchema, nekurira, sezvinongoitwawo nevanhu vose. Kamusikana kadiki kakanaka, mwanasikana wemufundisi, akanga afa, akanga abviswa panyika ino. Zvimwe ainge afa kwemaawa, uye vakanga vamuradzika pamubhedha, vagadzirira kugadzira mutumbi wake nemishomga, zvichida, vomuendesa, kunovigwa.

¹⁵² Zvino tinoona kuti Jesu akapinda mumba. Vese vachiungudza. Akati, “Tipei runyararo.” Akati, “Haana kufa, asi akarara.”

¹⁵³ Zvino mungafungidzira here zvavakafunga? “Nhai, murume uyu tinoziva, zvino. Tinonzvisisa kuti Iye mwana weupombwe. Uye tinonzwa nezvaKe, zvese zvaAnofembera zvinganzwisisiki zvaAnotaura. Uye zvino tinoziva kuti muprisita wakagona, ‘murume uyu anopenga,’ nekuti tinoziva kuti musikana afa. Chiremba ataura kuti ‘afa,’ uye hepano paarere. Waenda, uye tinoziva kuti afa.” Vakati, vakaMuseka

zvine kuzvidza, nemamwe mashoko, vakaMuita kuti anzwe kunyara, nekuMutsoropodza.

¹⁵⁴ Asi Ainge atotaura nechekare kuti anga asina kufa. Ndzvo zvega zvazvinotora. "Akarara." Hazvinei nekuti pane kutsoropodzwa kwakawanda sei, Ari kuzongoratidza Shoko raKe! Akavabuditsa vese panze peimba, ndokubuditsa vasingatendi vese kunze. Akatora Petro, Jakobho, naJohane, vatendi, zvapupu zvitatu, nababa namai, akapinda akabata ruoko rwemusikana, akataura nemumwe mutauro wakadana mweya wake kudzoka kubva kune imwe nzvimbo yekure-kure muna Ziendanakuenda. Musikana akararama.

¹⁵⁵ Chii chaAkaita? Akaratidza Shoko raKe. Akaratidza izvozvo zvaAkanga ataura. Ainge asina kufa. Ainge akarara. Zvino tinoona kuti, achiita izvi, achiziva, uye Akaratidza chimwe chinhu ipapo. Zvino Akaratidza kuti Akanga ari Mwari. Akaratidza kuti Akanga achifanoziva nechekare. Tarisai zvino zvakataurwa neShoko raKe zvino. "Haana kufa, asi akarara." Munoona, chekutanga, akanga asina kumbofa. Akanga akarara. Kuratidza kufanoziva kwaKe. Zvino, panogona kunge paingé pane vanasikana vadiki vakawanda vainge vafa mangwanani mamwe chete iwayo, asi uyu akanga asina kufa. Akanga akarara, sezvakanga zvakaita Razaro. Zvino Akamudana kubva kuhope ikoko, nekuti akanga asina kufa.

¹⁵⁶ "Zvino uyo anotenda maNdiri, kunyange akafa, asi achararama; uye ani nani anorarama achitenda maNdiri, haazofi." Avo chete vari muBhuku reHupenyu reGwayana, avo vaAkadzakinura paAkafa, ndivo vaAchadana kubva kuhope, nezuva iroro, avo vanomutswa nesimba raKe, vane simba rekumuka riri mavari. Kunyangwe sezvandakataura usiku hwapfuura; kunyange mushure mekunge Erisha afa, mapfupa ake arere muguva, simba iroro rekumuka rakanga richingoripo pamapfupa ake.

¹⁵⁷ Zvechokwadi, Akaratidza kuti akanga Ari Ani. Zvino tinoona zvakare, zvimwe chetezvo, Akaratidza zvakare, kuti, muna vaHebheru chitsauko 4 uye pandima 12, Akaratidza kuti Akanga ari Shoko raMwari. Akadaro zvechokwadi. Cherechedzai zvaAkaita. VaHebheru, 12, vaHebheru 4:12 inotaura kuti, "Nekuti Shoko raMwari rine simba, ibenyo kukunda munondo unocheka nekumativi maviri, uye—uye iRo zvakare Munzveri wemifungo nendangariro dzemoyo." Tarirai zvino kwechinguva chidiki.

¹⁵⁸ PaAkatanga shumiro yaKe, mushure mekunge Auya akaratidza kuti Akanga ari Shoko, paAkanga abva murenje mukunoedzwa kwaKe, pakanga pane murume ainzi Petro, zita rake ipapo rainzi Simoni. Akanya kuna Jesu nemunin'ina wake, Andrea. Paakangopinda muHupo waJesu Kristu, Jesu akati, "Zita rako ndiSimoni. Uye rababa vako ndiJonasi. Kubva zvino

wava kunzi Petro.” Izvozvo zvakaratidza kuti Akanga ari Shoko, nekuti Shoko Munzveri wemifungo nendangariro dzemoyo. Akanga ari Shoko.

¹⁵⁹ Firipi akaona izvi zvichiitika. Akaenda ndokupoterera seri kwegomo, akaenda kwezuva rimwe chete, akadzoka. Akadzoka neshamwari yake yainzi Natanaeri. Zvino akati, “Zvinhu izvi zviri kutoitika zvemazvirokzwazvo. Mosesi akati ‘Jehovah Mwari wedu achasimudza Muporofita’ akafanana naye, zvino Munhu wacho ari pano. Handiti, Akaudza Simoni kuti akanga ari ani, kunyange nekuti baba vake vaive ani, uye tinoziva kuti zvaAnotaura ndezvechokwadi. Nokuti, Mwari akazvitaura muShoko, uye pano zvaratidza kuti Iye aizoita izvozvo, uye izvozvo zvinoratidza kuti ndiMesiya.”

¹⁶⁰ Zvino paakafamba achipinda muHupo hwaKe, Jesu akati kwaari, akati, “Tarirai muisraeri, asina kunyengera maari.”

¹⁶¹ Akati, “Rabhi, iMi makandizivirepiko?”

¹⁶² Akati, “Firipo asati akudana, uri muzasi momuti, Ndakakuona.” Akaratidza Shoko raKe. Akaratidza Shoko raMwari. Akazviita.

¹⁶³ Mudzimai wepatsime, paakanga aine... Zvakanaka, Akamukumbira kuti aMupe mvura yokunwa kubva muchirongo chaaishandisa kuchera mvura mutsime, iye akati, “Hazvisi pamurawo kuti imi maJudha mukumbire isu vakadzi vechiSamaria chinhu chakadaro, nekuti hatifambidzani.”

¹⁶⁴ Akati, “Dai waiziva Uyo wauri kutaura naye, waizoNdikumbira mvura.”

Akati, “Tsime rakadzika.”

¹⁶⁵ Zino nhaurirano, payairamba ichienderera mberi, pakupedzisira Akazowana kuti dambudzikoro rake rakanga riri rei. Zvino Akati, “Enda unotora murume wako, ugouya pano.”

Mukadzi akati, “Handina murume.”

¹⁶⁶ Akati, “Wataura chokwadi, nekuti wanga une vashanu, uye uyo waunaye zvino haasi murume wako.”

¹⁶⁷ “Nhai,” akati, “changamire, ndinoona kuti Muri muporofita.” Iye... “Tanga tisina kumbova naye kwemakore mazana mana, munoziva.” Akati, “Ndinoona kuti Muri muporofita. Zvino, tinoziva kuti kana Mesiya auya, anonzi Kristu, kana Auya, Achatiudza zvinhu zvakadai. Ndicho chichava chiratidzo chaKe.”

¹⁶⁸ PaAkati, “Ndini Iye ari kutaura newe,” Akaratidza Shoko raKe. Iye... isu tinoratidza izvo zvaAkataura kuti ari. Akanga ari Mesiya, Mwanakomana waMwari.

¹⁶⁹ Zvino tinoona kuti, zvakare, kuti mudzimai mudiki uyu akanga ane dambudzikoro rekubuda ropa iri, akabata nguwo yaKe, zvakaratidzawo kwaari kuti Akanga ari Shoko raMwari.

¹⁷⁰ Zvino rangarirai, manheru ano, Jesu akati...Zvakare, muna vaHebheru, 1, vaHebheru chitsauko 3, ndinotenda ndiyo, Akataura kuti, "Iye iko zvino Muprisita Mukuru," muzera rino ratiri kurarama mariri, "Muprisita Mukuru akagara paHukuru hwaMwari, muMatenga, anogona kubatwa nemanzwiro ohutera hwedu."

¹⁷¹ VaHebheru 13:8 inoti, "Ndiye mumwe chete, zuro, nhasi, nokusingaperi." NdiMwari mumwe chete sezvaAkanga ari kareko. Ndiye mumwe chete manheru ano.

¹⁷² Mutsvene Johane 14:12, Iye akati, "Uyo anotenda kwaNdiri, mabasa aNdinoita achaaitawo. Achaita makuru kune aya, nekuti Ndinoenda kuna Baba vaNgu." Maona here? "Uyo anotenda kwaNdiri, mabasa aya Andinoita achaaitawo."

¹⁷³ Muna Mateo 28, Iye akati, "Muchinguva chidiki nyika haichazoNdioni, asi imi muchaNdiona, nekuti Ndichange ndinemini kunyange kusvikira kumagumo enyika."

¹⁷⁴ Jesu Kristu mumwe chete zuro, nhasi, nokusingaperi. Akamira, manheru ano, kuti aratidze Shoko raKe. (Nguva yangu yaper.) Asi Akaratidza kuti Aizvikwanisa. Akaratidza Shoko raKe ipapo, zvaAkanga avimbisa zuva iroro. Akaratidza mashoko aIsaya. Akaratidza mashoko aNoa. Akaratidza mashoko aMosesi. Akaratidza rimwe nerimwe remashoko ose evaporofita.

¹⁷⁵ Akavimbisa kuti muzuva ranhasi, zuva ratiri kurarama mariri, kuti nyika ichange iri muchinhanho cheSodhoma, ngochani. Chingozvitarisai munyika nhasi, pasi rese kwandinofamba; kwete muno chete, kwese-kwese. Zvatonetsa. MuSweden, varume vechidiki nemadzimai echidiki vanoenda kunotamba mutserendende pachando, vakashama zvachose. Naivo vemugermany nevemuFrance, nekumwe kwese, zvakangoda kufanana nemhomho dzavanhu vasina maturo vomuno muUnited States. Ndiro zera racho. Ini, kana ndikazowana mukana wekudzoka, ndinoda kuzotaura nezvezvimiwe zvinhu zvechiporofita, kwamuri, ndokuratidzai kuti, izera ratiri kurarama mariri. Bhaibheri rakataura kuti, "Vana vachatonga vabereki vavo."

¹⁷⁶ [Chibenga chisina chinhu patepi—Mupepeti.]...Shoko.

¹⁷⁷ Asi, rangarirai, Abrahama akanga ane mbeu, yakanga iri mbeu Isaka. Akanga ane dzimwe mbeu mushure mekuwa kwaSara. Uye akanga ava nemakore zana nemakumi mana nemashanu, akaroora mumwe mudzimai, akaita vanakomana vanomwe tisingaverengi vanasikana, nekuti Mwari akanga amudzosera kuita murume wechidiki paakanga ava nemakore zana. Ipapo akanga ava zvakare nemakore makumi mana nemashanu, saka ipapo aka...Tinozviviza izvozvo. Ndakakuparidzirai izvozvo muno muCalifornia, makore akawanda apfuura.

¹⁷⁸ Uye zvino tinonzwisia kuti Mbeu yaAbrahama yakanga isiri mbeu yekusangana kwake chaiko naSara, kureva Isaka, yakazoita rudzi, asi Mbeu yehumambo yakabva pavimbiso, yakanga iri Jesu Kristu. Zvino kubudikidza neMbeu iyoyo, Iye akabuditsa Mbeu yehumambo. Oo, ini zvangu! Zvino tava huprisita hweumambo, rudzi rweumambo, rudzi rutsvene, tichipa kurumbidza kuna Mwari, chipiriso chemiromo yedu tichipa kurumbidza kuZita raKe. Mwari akaratidza Shoko raKe, Akadurura Mweya Mutsvene pamusoro pedu.

¹⁷⁹ Akati, “Sezvazvakanga zviri mumazuva eSodhoma, ndizvo zvazvichange zviri muzuva iro Mwanakomana wemunhu paachazarurwa.” Zvino macherechedza here? Kubva kuMwanakomana waMwari, paAnenge oda kuzova Mwanakomana waDhavhidhi, Anozvizarura pachaKe zvakare seMwanakomana wemunhu. Macherechedza here Gwaro racho?

¹⁸⁰ Nekuti, Anogara achidaro, Iye haaite chinhu kusvikira Achizivisa kuvaranda vaKe vaporofita. Ndizvo chaizvo. Ndizvo zvakanga zviri vimbiso yaKe. Maona? Hapana chaanomboita... Mwari haanganyepi. Anogara achizvizarura, kutanga, asati Azviita.

¹⁸¹ Tarisai mamiriro atakagara maari nhasi. Tarisai patiri. Mumwe nemumwe wenyu munobvuma kuti tiri muSodhoma rechimanjemanje. Munoziva kuti nyika ino itori mazviri. Pane...hapasisina tariro; hapasisina ruponeso rwuchiripo rwenyika ino kana imwewo nyika. Tapfuura izvozvo zvino. Zviporofita zvakaporofita nezve izvi, zvazadzikiswa. Mwari ari kunongererera tsanga, achitora gwayi riya diki rokupedzisira chero kupi kwariri. Ose achange apinda mukati, rimwe zuva. Tava panguva yemagumo. Tarisai, patiri pacho.

¹⁸² Ndinokukumbirai, sehama kana hanzvadzi, kuumba kutenda kwakawedzerwa tisati tanamatira vanhu ava. Uye ndinoziva kuti hatina nguva yatinofanirwa kunzi tibve muno nayo. Asi ndi—ndi—ndinoda kutanga mutsara wekunamatira, zvino imi vanofanira kuenda munogona kuzoenda henyu. Maona? Imi vanoda kusara mumutsara wekunamatirwa munogona kusara henyu. Asi chingondiregai, sehama, ndingokuratidzai chimwe chinhu kwechinguvana.

¹⁸³ Tarirai Jesu, muna Ruka 17:30, muone, apo paAitura ipapo nezvenguva yekupedzisira, kuti vachange vakaita seavo vemumazuva aNoa. Ipapo Akati, “Uye kufanana, senge, mumazuva eSodhoma,” akati, “kana Mwanakomana wemunhu ava kuzarurwa.” Mwanakomana wemunhu zvakare, kwete Mwanakomana waMwari. “Mwanakomana wemunhu,” munoona, ndizvo zvinounza Maraki 4 zvakare, ichidzoka ipapo chaipo. Zvimwe zvese zviporofita izvi zvichipinda, kuti zvinofanira kuitwa sei. Anoratidza Shoko raKe kuti ndiro. Ndizvo chaizvo.

¹⁸⁴ Uye cherechedzai, mukuita izvozvo, kuti Achazodurura sei Mweya waKe pamusoro penyama yese, uye nezvichazoitika, kuti kudzoreredzwa kuchadzoka sei. “Uye vanakomana nevanasikana venyu vachaporofita. Pamusoro pevarandakadzi neverandasikana vaNgu Ndichadurura kubva muMweya waNgu. Uye Ndicharatidza zviratidzo mumatenga kumusoro.”

¹⁸⁵ Ndine mufananidzo pano, waHama Lee Vayle vari pano. Ndinoda kukuratidzai kuti chii chakaitika pamusoro pegomo, rimwe zuva, apo vana vese vechikoro vanga vabuda, kumashure kwechidzidzo chikuru chakazarurwa, zviya Zvisimbiso Zvinomwe. Apo vana vechikoro pavakabuda panze, pandakanga ndiri pamusoro ipapo ndichinamata, hepanoi paive neMoto wakaumbwa sefanera uchidzika pasi, zvino wodzokera mudenga wobva waputika, wotenderera uchidzoka pasi zvakare. Ndizvo zvaAkatura kuti ndizoudza vanhu. Isu...Heunoi Uyo pano, apo zvikoro zvekuTucson...uye nepaWakakwira uchienda kumusoro mumhepo.

¹⁸⁶ Zvino sainzi yakatora mifananidzo, nezvakadaro, vakabvunza nezvaWo. Vakati, “Uri papiko pacho? Chii chaitika?” Havasi kuziva kuti chii, munoono. Oo, hazvina kuitwa pakona, bedzi ihana dzakasvibiswa. Hazvina...Jesu, paAkanga ari pano, pane mamiriyoni evanhу vasina kumboziva kuti Akanga ari panyika. Hongu. Pachange pane mamirioni nhasi vasingazozvinzwisise, makumi emamiriyoni avo.

¹⁸⁷ Asi kuchange kune, kune Avo vaYakatumirwa, vachanzwisisa. “Vakachenjera vachaziva Mwari wavo nezuva iroro, uye vachaita mabasa makuru.” Tinoona kuti, inguva yacho yatiri kurarama.

¹⁸⁸ Tarisai kuSodhoma zvino, tarisai zvakaitika. Akati, “Sezvazvakanga zviri mumazuva eSodhoma.” Pakanga pane boka revanhu vaitarisira mwanakomana akavimbiswa. Tinozvitenda izvozvo. Akanga ari Abrahama neboka rake. Pakanga pane boka revanodziya, Roti, anga adzokera kumashure zvishoma, asi ari mutendi; zasi muSodhoma. Mapoka matatu evanhу.

¹⁸⁹ Panogara pane mapoka matatu. Vanhu vaHamu, Shemu, nevaJafeti. Zvakare, vatendi, vatendi vekabanga, nevasingatendi. Vari kwese-kwese, uye tino—tinovawana muboka rega-rega. Uye, kwese-kwese, munovawana. Uye mapoka iwayo achiripo. Unofanira kugona kuvapatsanura. Unogona kuzvitora wodzika nazvo nemuMagwaro, zvinonyatsopfekerana zvakanaka.

¹⁹⁰ Tererai kune izvi. Tarisai patakagara, panzvimbo nepachiporofita, manheru ano. Zvino, mumwe nemumwe wedu anoziva kuti nyika iri muchinhanko cheSodhoma.

¹⁹¹ Tinoziva zviporofita zvese zveIsraeri, yava kumusha kwayo. Kana uchida kuziva kuti takamira papi senyika, tarisa Israeri, pairi.

¹⁹² Kana muchida kuziva chinhando chekereke, tarisai maitiro emadzimai. Mudzimai ikereke. Mutarisei, hunzenza, kushaya hunhu; tarisai, onai pane kereke. Chingoitarisai, munoona, munoona, ingotarisai madzimai. Munona kuti papi, zvokuti vakadzi venyu vanoderera sei uye vova vakasviba kwazvo, ndizvo zviri kereke yenyu, munona, mufananidzo.

¹⁹³ Tarisai pane Israeri, munozona nguva yatiri pairi. Munona, chingotarisai zviratidzo izvozvo nezvishamiso. Kana imi—kana imi, kana maziso enyu akavhurika, onai kuti tiri papi.

¹⁹⁴ Zvino tarisai panzvimbo patakagara, nyika iri muchinhando cheSodhoma. Zvino cherechedzai, “sezvavzvakanga zviri.” Zvino cherechedzai, pakanga pane mumwe munhu, muzuva iroro, aitarisira kuuya kwemwanakomana akavimbiswa. Abrahama naSara, vaitarisira mwanakomana akavimbiswa muboka raAbrahama. Vakanga vasiri muSodhoma. Asi munguva iyoyo, chitsauko chekupedzisira chechiitiko ichocho, kumashure uko mwanakomana akavimbiswa oda kuuya, pane varume vatatu vakauya kubva Kudenga, Ngirozi...Ngirozi mbiri naMwari. Vakadzika vakataura naAbrahama, pasi pemuoki. Ndizvo here? [Ungano inoti, “Ameni!”—Mupepeti.] Zvino vaviri vavo vakadzika vakanopinda muSodhoma vakadanidzira vachipikisana nezvivi zveguta. Kwakanga kuri kumashure kwekutsva kwenyika yeMarudzi, panguva iyoyo. Sodhoma yese yakapararira ipapo. Vangori vashoma chete vakabuditswa, Roti nevanasikana vake vaviri. Mudzimai wake haana kukwanisa kubudirira; akacheuka. Ndingada sei kuwana nguva yekukuratidzai izvozvo iye zvino, apo pakamira kereke iyoyo iri panzvimbo iyoyo. Ndinoda kuti mucherechedze zvino.

¹⁹⁵ Zvino Murume mumwe chete akasarapo, uyo akataura naAbrahama, uye Akaita chiratidzo kuna Abrahama. Zvino, tarisai, Abrahama akanga aona Mwari muzviratidzo zvikuru zvakawanda. Tinozvitenda izvozvo, hatizvitendi here? [Ungano inoti, “Ameni.”—Mupepeti.] Kumashure kwacho apo mwanakomana oda kuuya. Asi mwanakomana asati aratidzwa, pane chiratidzo chaakapiwa.

¹⁹⁶ Nekuti, Mwanakomana, Mwanakomana wechokwadi, aifanira kuzova Mwanakomana waMwari, kubudikidza nekutenda kwaAbrahama, munona, aiva Jesu. Isu zvatiri mbeu yaAbrahama, takafa muna Kristu, tiri mbeu yaAbrahama.

¹⁹⁷ Cherechedzai zvino izvozvo zvisati zvaitika, zvemwanakomana uyu aizouya. Zvino, Uyu akasara akataura naAbrahama, akanga Akafuratira kutende, Akati, “Abrahama.” Zvino, zuva rimwe chete kumashure kwaizvozvo, anga ari Abrama. Zvino Akati, “Abrahama, Sara, mukadzi wako

aripliko?" kwete Sarai, S-a-r-a-i. S-a-r-a, mukunda wamambo. "Sara, Mukadzi wako aripliko?"

Akati, "Ari mutende kumashure kweNyu."

¹⁹⁸ Akati, "Ndichakushanyirai, munoona, maererano nevimbiso yaNgu yaNdakakupa." Nemamwe mashoko, "Nguva yehupenyu, Sara achatanga nguva yake yeupenyu yemazuva ose zvakare."

¹⁹⁹ Zvino Sara, achembera, ava nezana remakore zvino, ari mutende, akasekera mumoyo. Munoona, akanyemwerera pachake, akati, "Ko Murume uyu angataura zvemazvirokawazvo sei? Munoona, ini chembere, ishe wangu Abrahama ari panze apo, achemberawo, hukama hwemhuri hwakanga hwakasoguma kwemakore." Akati, "Ndingava nemufaro zvakare sei naishé wangu? Iye achembera, uye ini ndachemberawo, ndapfuura zera rekubereka, tsinga dzemukaka hapasisina, zvese... 'Mudzimai aoma.' Ko tingave nemufaro zvakare sei?"

²⁰⁰ Zvino Murume uya, Akafuratira tende, akati, "Ko Sara asekeiko, achiti, 'Zvinhu izvi zvingaitika sei?'" Chakanga chiru chii ichocco? Kunzvera zvakavanzika, zvechiporofita! Maona? Maona? Ndizvo zvaakaona.

²⁰¹ Zvino Akati, "Izvozvo zvichadzoka zvakare, neMwanakomana wemunhu," zvazvainge zviri, akanga ari Mwanakomana wemunhu ipapo chaipo. Zvakanaka, akaMudana kuti Erohimu, "Jehovha Mwari." Erohimu, chero munhu wese anoziva kuti ndizvo, Erohimu ndiJehovha Mwari. "Pakutanga Erohimu akasika matenga nenyika," Uyo akakwana muna zvose. Mwanakomana wemunhu akaitwa nyama, heUno! akamira ipapo ari munyama panguva iyoyo, sethiyofani, akamira ipapo achinzvera zvaitaurwa naSara ari mutende kumashure kwaKe. Akavimbisa. Tarisai. Mbeu yeHumambo yaAbrahama yakavimbiswa kuona zvime chetezvo.

²⁰² Asi cherechedzai Roti, akanga ane mutumwawo zasi ikoko, zvakare, vaviri vavo vakadzikako. Mumwe wavo akadzikako zasi, uye mumwe wacho akaendawo naye, uye vakaparidza vakadana vanhu kuti vatize kubva pakutsamwa kwaizouya.

²⁰³ Pamamiriro chaiwo, nyika haisati yambogara muchimiro ichocco, kubva pazuva iro Jesu paakaita vimbiso iyoyo, kusvikira iye zvino. Ndinoda kubvunza chero mukuru wezvenhoroondo angadai ari mumba muno, kana kuti mukazonzwu patepi ino, uye nokuzozvinzwu chero nguva hayo, ndapota ndinyorerei. Ndakanzvera nhoroondo kwemakore makumi matatu, nhoroondo yeBhaibheri, uye hapasati pamboita munhu wandati ndamboona munhoroondo yese yekereke, nemumazera manomwe ekereke. Nokuti tava zvino muRaodhikia, uye tinozviviza izvozvo.

²⁰⁴ Hakuna kumboita mutumwa, akamboenda kukereke yose, aine zita rake rinopera na h-a-m, kusvikira iye zvino. G-r-a-h-a-m, Billy Graham. Kwakava navanaMoody, Finney, Sankey,

Knox, Luther, nevamwe, asi kwete h-a-m, "baba kundudzi." Zvino rangerirai, ndi G-r-a-h-a-m, mavara matanhatu. Asi A-b-r-a-h-a-m mavara manomwe. Cherechedzai, vari zasi uko, Billy Graham, achipinda ku—kumativi ese enyika, achidanira kubva muSodhoma, "Budai, tizai kutsamwa kuri kuuya." Hakuna murume wandinoziva nezvake, mumunda wekuvhangera, akabata Mwari, pashoko riya rekururamiswa, sezvinoitwa naBilly Graham. Anogona kunyatsoriunza. Haasi mudzidzi chaiye webhaibheri...ndinofungidzira kuti mudzidzi webhaibheri, asi haasi anganzi mudzidzisi ane simba guru. Asi Mwari anaye. Murume iyeye anomira ipapo aine chidzidzo tingati secheSunday school, zvino obata vanhu ivavo vachingoshamisika. Muranda waMwari wenguva. Kuna ani? Kereke yepanyama, iri muSodhoma.

²⁰⁵ Asi rangerirai, pakanga pane kereke imwe chete yepamweya, yakanga isiri muchirongwa chemasangano, zvakare. Boka rakadanirwa kunze, uye vakagamuchira mharidzo, zvakarewo, pamwe nemutumwa. Zvino chakanga chiri chii? Kunzvera pfungwa dzakanga dziri mumoyo. Mwari nguva dzose anogara achiratidza Shoko raKe.

²⁰⁶ Ngatinamatei. Baba vanodikanwa voKudenga, nguva yakakosha iyi, apo sarudzo dzinofanira kuitwa, nguva iri kufamba, hatizive nguva iyo Ishe wedu yaanogona kuuya. Uye tichiona zviporofita izvi zvakaitwa naYe, kubudikidza nevaporofita veNyu zvichidzika nemumazera, zvava kubhedhenurwa zvino. O Mwari, ndinoKutendai kwazvo nokuda kweizvi, kuti kunyange varume vane kukwanisa mavari, varume vanogona mune—mune zvekunzvera magwaro, vanogona kumira vachipikisana nekunyengera kwenyika pamwe nevasingatendi, uye nepamapoka aya, pasina kana kupokana vanomira ipapo vakashinga uye noumhare, vachiziva pavakamira voratidza kuti Shoko iroro nderechokwadi, neMagwaro. Uye zvino isu takamirira paKuuya kweNyu, Ishe, tichitenda zvimwe zvinhu izvi zvakaporofitwa kuti zvichaitika, kumira tichifara tichiKuonai muchifamba pakati pedu uye muchiita chinhu chaicho chaMakati chichaitika, muchiratidza kuti Shoko reNyu nderechokwadi. Mwari voKusingaperi, vana veNyu vanorwara vagere pano.

²⁰⁷ Handizive kuti tichinezve imwe nguva yakadini yatinofanira kushanda. Zuva remadekwana rava kunyura. Asi Makavimbisa, kumuporofita, "Kuchave neChiedza panguva dzemadekwana." Uye tinoona zuva rimwe chete rinobuda kumabvazuva, ndiro rimwe chete rinodoka kumadokero. Zvebulidiro yehungwaru zvakafamba pamwe nezuva uye zvino tava kuMahombekombe eKumadokero, uye Evhangeri yakafamba nebulidiro. Zvino, Baba, tinoziva kuti aya ndiwo magumo eVhangeri, magumo enguva, magumo ezera. Rava kupera richipinda muna Ziandanakuenda. Asi Makavimbisa

kuti Mwanakomana achauya, Mwanakomana wemunhu achazarurwa. Mumazuva ekupedzisira, izvi zvichaitika. Zviedza zvemadekwana zvauya, Baba. TinoKutendai naizvozvo. Uye nekuninipisika kwazvakaita, asi Imi munozviita zviri nyore, nguva zhini, zvokuti zvinopfura nepamusoro pevakuru, vanonzi vanofungisisa, uye mozvizarura kuvacheche avo vanodzidza.

²⁰⁸ Ndinonamata, Mwari, kuti Muzviite saizvozvo, manheru ano, kuti vana veNyū vanonzwisa urombo vari kurwara pano vaone vimbiso yaMwari, uye mumwe nemumwe wavo apodzwe, zvino vogobuda muno, mangwana, vaine mitumbi mitsva yakasimba, vava vatano zvakare. Zviitei, Ishe, kuti vagozotora Mharidzo kubva pane mumwe kuenda pane mumwe, kusvikira wekupedzisira apinda mudanga, ipapo mikova inozovharwa. Tibatsirei, Mwari vanodikanwa. NdinoKukumbirai, manheru ano, takatarisana nazvose izvi, kuti mungodaro kamwe chete zvakare, Baba, kwandiri.

²⁰⁹ Zva—zvairatidzika, humwe husiku huya, vanhu havana kumbonyanya kuzvicherechedza. Asi, ndinonamata, ngazviitike zvakare manheru ano, Ishe. Nekuti, ndapfuirira nguva yangu yandanga ndichifanira kutaura, asi handizive kuti tichatora nguva yakareba sei tichiita izvi. Saka, ndinonamata, Baba, Muchandinzwa here? Uye inzwai munamato wevarume nevakadzi vane humwari ava vakagara muno manheru ano, vakazadzwa neMweya weNyū. Vatendi, Ishe, Munogona kungoshanda pakati pavo. Uye tiri...ndinonamata kuti Muchasimbisa Šoko reNyū raMakataura kuti, “Uyo anotenda kwaNdiri, mabasa aNdinoita achaaitawo.” Ngazviitike zvakare, Jesu, kuratidza kuti Muri mumwe chete zuro, nhasi, nokusingaperi. Ndinozvikumbira kuitira kubwinya kwaMwari, muZita reMwanakomana waKe, Jesu Kristu. Ameni.

²¹⁰ Zvino, kwechinguva chidiki, ndinoda kuziva kuti vanhu vangani vari muno vane makadhi ekunamatirwa. Ndi—ndinoda kuti musimudze maoko enyu, mumwe nemumwe wenyu vane makadhi ekunamatirwa. Zvakanaka, pose-pose, ndinofungidzira, zvingangoita kwese-kwese.

²¹¹ Handingazivi kuti vanhu vangani venyu muno vasina makadhi ekunamatirwa, asi muchirwara, mungasimudza here maoko enyu moti, “Handina kadhi rekunamatirwa, asi ndiri kurwara. Ndine chikumbiro.”

²¹² Ndinoda kukukumbirai kuti muremekedze kwechinguvana. Zvino, ndinofarira kutaura nemi. Ndiro rinogara riri dambudziko rangu, ndinotaura kwenguva yakarebesa. Asi musati mauya, ndi—ndine tariro nevimbo yekuti Mwari acharatidza izvi nezvandaura kuti iChokwadi, uye morega—morega Iye aone.

²¹³ Zvino, vangani vakagara kunze uko vanorwara, vanoziva kuti hapana chinhu chimwe chandinoziva nezvenyu, simudzai maoko enyu. Ingoonaiwo izvo. Zvakanaka.

²¹⁴ Ndinoda imi vasina makadhi ekunamatirwa zvino. Makadhi ekunamatirwa achazosheedzwa. Ndinoda kuti munamate.

²¹⁵ Bhaibheri rakataura kuti, "Jesu Kristu mumwe chete zuro, nhasi, nokusingaperi." Anoti, "Ndiye Muprisita Mukuru akagara ipapo achireverera pakupupura kwedu." Tinofanira kutanga tazvipupura, Iye asati ava Muprisita Mukuru, nekuti Anongoreverera bedzi pakupupura kwedu. Ndizvozvo here, hama vashumiri? [Vashumiri vanoti, "Ameni." —Mupepeti.] Munoona, Anongoreverera chete pakupupura kwedu, izvo zvatinopupura kuti ndizvo zvaAri, izvo zvaAkatiitira. Kwete zvaAchaita. Akatozviita kare. Tinofanira kupupura kuti Akatozviita. "Akakuvadzwa nekuda kwekudarika kwedu, nemavanga aKe takatopodzwa."

²¹⁶ Zvino, Baba voKudenga vanoziva. Zvino ndichitarisa pamuri, kuona kuti ndinocherechedza shamwari yangu yakanaka inobva kuOhio, ivo nemudzimai wavo vakagara pano, ndaVaDauch nemudzimai wavo. Uye ndinotenda, vakagara pechipiri kana pechitatu kubva pavari, ndizvakare Mufundisi uya, VaBlair vandakaona usiku hwapfuura. Kwava nerima pamusoro pevatereri, nekwandiri, nekuda kwezviedza izvi pano zviri kuita sokundidzimaidza, uye handi—ndisi kukuonai zvakanaka.

²¹⁷ Asi ndinoda kuti munamate. Zvino iwe isa pamoyo wako chinhu chauri kuda, zvino wokumbira Muprisita wedu Mukuru, Anogona kubatwa nemanzwiro ohutera hwedu.

²¹⁸ Zvino, ini ndisingakuzivei, uye unogona kundibata pose-pose, seuri kubata hama yako, murume wako, mufundisi wako, mumwewo munhu, hazvina—hazvina zvazvinobatsira. Asi kana mukaMubata, uye kana tiri muhumwe chaihwo neMweya waKe, ipapo Anogona kushandisa kutenda kwako kuti uMubate, uye nechipo changu chekuzotaura nemachiri.

²¹⁹ Munoona, ndinenge ndingori chimumumu seichi, ichi chiri *pano*, chisina inzwi riri kutaura nemachiri. Panotofanira ... Ichi, ichi hachina inzwi rachinobuditsa kana pasina chimwe chinhu pano chiri kutaura nemachiri. Ndizvo zvime chetezvo nemunhu upi zvake, chimumumu, kana zvasvika pazvinhu izvi, kunze kwekunge Mwari ataura kubudikidza nemavari.

²²⁰ Zvino chinamatai, uye ngationei kana zvinhu izvi zvandataura zviri chokwadi. Mwari ngavabatsire kuti zvive saizvozvo. Handisi kuti Achadaro. Ndinotarisira kuti Achadaro. Ndiri kuvimba kuti Achadaro. Haasati ambondikundika nazvino, pamakore ese aya, kudambura nepakati nekupoterera pasi rose, kundudzi dzose dzakasiyana-siyana, nemamiriyoni evanhu. Haasati ambondikundika nazvino. Uye ndine chokwadi,

kungove nechokwadi sokutenda kwandinoita kuti ndakamira pano, haAzondikundiki zvino.

²²¹ Ndichakukumbirai kuti muremekedze moramba makagara pasi, kwechinguva chidiki. Tichaita kuti mhomho zhinji iende zvayo tonamatira vanorwara, muchinguvana.

²²² Asi ndinoda imi, imi vatendi, kuti musangotarisa kwandiri, asi tendai. Moti, “Ndinotenda kuti zvataurwa nemurume uyu iGwaro. Handizive sezvo nguva yapera sezvaatura kuti tiri. Asi, kana zviri izvo, zvino zvinofanira kuitika. Kana Mashoko ake ari Mashoko aMwari, zvino, mashoko ake anokundika asi Mashoko aMwari haakundiike.”

²²³ Mwari anosungirwa kutsigira Shoko raKe. AchaRiratidza. AchaRiratidza. “Uyo anotenda kwaNdiri.” Akaratidza kuti rino ndiro zuva rekupedzisira. Akaratidza zvaizoitika. Akaratidza kuti izvi zvaifanira kuzoitika.

²²⁴ Uye, rangarirai, Abrahama neboka rake havana kuzombogamuchira chimwezve chiratidzo kubva kuna Mwari, kusvikira mwanakomana akavimbisia asvika. Vangani vanoziva kuti ichokwadi? [Ungano inoti, “Ameni.”—Mupepeti.] Chiratidzo chiya chekunzvera! Zvakare mbeu yehumambo yaAbrahama, regai ndikunzwei... Regai ndikuudzei, ZVANZI NAJEHOVHA, muri kugamuchira chiratidzo chenyu chekupedzisira. Zviri maererano neMagwaro nechizaruro chaMwari chiri mumoyo mangu, chinotaura kuti ichi iChokwadi. Uye ndinovimba kuti muchazvitenda kuti iChokwadi.

²²⁵ Zvino imi tendai. Munhu wese chingotenda, woti, “Ishe Jesu, regai ndiKubatei. Ndine chikumbiro mumoyo mangu, uye ndinoziva kuti Hama Branham hapana chavanoziva pamusoro pangu. Handitombozive murume uyu, iye haandizive, asi iMi munoziva. Zvino kana andiudza Chokwadi, izvi zvichaitika.” Ndinokukumbirai, musafamba zvino, kwechinguva chidiki. Ivai zvachose...

²²⁶ Munoona, uri mwuya. Zvino ndinotora mwuya wese uri muno ndouisa pasi pesimba rangu, muZita rajesu Kristu, kuti Shoko raKe rizadziswe.

²²⁷ Zvino ivai nekuremekedza. Namatai. Tarisai kwaAri, moti, “Ishe, ndinozvitenda. Batsirai iMi kusatenda kwango.”

²²⁸ Ngatitangei. Ndinozanira kuisa pfungwa dzangu dzose pane chimwe chikamu chechivakwa chino, nekuti, munoonaa, makawanda, uye mumwe nemumwe wenyu muri mwuya.

²²⁹ Handigone. Woti, “Ko zvakadii nenii?” Handigone kukuudza. Unoita sezvaunoda. Mabasa ese aMwari ari sekuda kwake. Pachange pane vanhu vakawanda vachapodzwa vachifamba vachipfuura nepepuratifomu ino, manheru ano, zvimwe vakawanda havapodzwe. Zvese zviri mukuzvitonga kwaMwari.

Ndiani angaMuudza zvekuita? Hapana. Anoshanda maererano nekuda kwaKe pachaKe, nehurongwa hwaKe pachaKe.

²³⁰ Asi iwe chingotenda. Zvininipise. Iva wakagadzikana. Chingotambanudzira kuna Mwari, woti, “Ishe Mwari, ndinozvitenda.” Maona? “Regai ndibate nguwo yeNyu. Ndinoda *chakati-nechakati*. Ndinoziva hama haindizive kana kuziva chandinoda, asi vatiudza nezvezvinhu izvo zvaMakaita, uye ndokuti Muri pano zvime chetezvo nhasi.”

²³¹ Izvozvo hazvisiye imi hama muri papuratifomu, chero ani wenyu. Ndinongokukumbirai, hama dzangu, sevashandi pamwe chete ve-veEvhangeri yaKristu. Ndinotaura kwamuri nekuperera kwandinoziva, semu—munhu anofawo nemi, munoona, achisiya nyika ino. Tinofanira kuenda. Uye ndinofanira kutaura zvandakaita neZuva reKutongwa, izvo zvandinotaura. Ndakazvichenjerera izvozvo, kunyatsozvichenjerera. Uye ndinokuyemurai imi varume, zvamuri, kumira pano nen, muchindibatsira. Ndiri kuedza kukubatsirai, kuita zvese zvandinogona, nekuda kweHumambo hwaMwari.

Ndiri kunamata ndichikumbira.

²³² Pano, vangani vakamboona Chiedza icho chiri mumufananidzo? Makamboona here mufananidzo waCho? [Ungano inoti, “Ameni.”—Mupepeti.] Hecho Ichō chakarembra apo. Hamusi kuChiona here?

²³³ Chiri pamusoro pemudzimai uyo akagara apo ane hengechepfu yake. Ari kunamatira mudikanwa wake. Ndizvoka, mudzimai. [Mudzimai anoti, “Ndizvo chaizvo, Hama Branham.”—Mupepeti.] Iye waunoda... Unotenda here kuti ndiri muporofita waKe, ndiregerereiwo, muranda waKe? [“Chokwadi ndinotenda.”] Unoziitenda here izvozvo? Zukanaka. Zvino, kana Mwari akandizarurira kuti chii chakakanganisika, sei, uchazvigamuchira here kuti zvabva kuna Mwari, semudzimai akabata nguwo yaKe? Zvino, unoziiva uri—uri mafiti makumi maviri kana makumi matatu kubva pandiri, kana kudarika, hauna kumbondibata. Asi pane Chimwe chinhu chawabata, zvaunotoziva kuti wakabatana neChimwe chinhu, Mumwe munhu. Zvazvir, ndezvemudzimai, anova mwanasikana wako. Ndizvozvo. Unotenda here kuti achaporeswa? Chidhakwa chembanje. [“Ndizvo chaizvo.”] Ndizvozvo chaizvo. [“Ndizvo chaizvo, hama.”] Ndinomuona achishambira, akadhakwa. Maona? Zvino, hengechepfu yaunayo muruwoko rwako, iise pamusoro pake, uye usapokana. Ndinotenda kuti Mwari achamudzakinura. Uchazvitenda here pamwe chete nen? Ameni. [“Oo! Mazviita, Jesu!”]

²³⁴ Zvino, handizive mudzimai uyu, asi Mwari anomuziva. Unotenda here zvino nemoyo wako wose?

²³⁵ Murume akagara pamusoro apo ane shati ine mitsetse-mitsetse, ane heniya, unotenda here kuti Mwari anokupodza nokukuita mutano? Unotenda here kuti Achazviita? Handisati ndamboona murume uyu muhupenyu hwangu. Mune kadhi rekunamatirwa here, changamire? [Murume anoti, "Kwete, handina."—Mupepeti.] Hamuna? Hauna basa nekuva naro.

"Kana ukangotenda chete!"

²³⁶ Pano pakagara mudzimai ari kuedza kutarisa nepamusoro pemudzimai akagara pano apa. Mutorwa kwandiri. Asi ari kuhuta-huta chaizvo. Handimuzive. Handisati ndambomuona, muupenyu hwangu. Asi Mwari anomuziva, uye anocherechedza izvezvi kuti akabatana neChimwe chinhu. Wanga uchinamatira chimwe chinhu ipapo. Chikonzero uri kudaro, haugone kugara zvinodarika manheru anhasi. Unofanira kusiya musangano. Uri kuronga kuenda kumba kwako, mangwana. Hausi wekuno, uyezve haubve kuCalifornia. Uchaenda kumabvazuva uchibva pano. Uchaenda nendege. Uri kuronga, kuenda nendege. Unobva kuOklahoma. Hongu. Ndizvo chaizvo.

²³⁷ Uri muchinhanho chekufa. Wauya pano kuzonamatirwa. Hauna kadhi rekunamatirwa. Asi watenda kuti uchapodzwa, kana ukangogona bedzi kusvika pano. Ndizvozvo. Zvakare, chinhanho chako une kenza. Kenza yacho iri mubhonzo. Unotenda here kuti uri kuzopodzwa izvezvi? Unotenda here kuti wabatana naYe, hanzvadzi yangu? Zvichida Mwari achandiudza kuti uri ani, zvino zvichakubatsira here izvozvo? Kana zviri izvo, simudza ruoko rwako kana uchizvitenda izvozvo, kuti (Mwari) zvichakubatsira. Zvakanaka, Mai Steel, munogona kudzokera henyu kuOklahoma.

Handizive mudzimai uyu. Handisati ndambomuona.

²³⁸ Pano pane mukadzi akagara kumashure kuno kumashure kwake. Ane dambudziko retsinga dzemumakumbo dzakazvimba. Uye anewo mwanakomana chidhakwa, uye ari kumunamatira. Kana akatenda, anogona kupodzwa. Mai Mason, mungatenda here nemoyo wenyu wose, uye motenda kuti Jesu Kristu achakupai kupodzwa? Munozvitenda?

²³⁹ Zvakanakai, zvino chiisai ruoko rwenyu pamudzimai uyo akagara pedyo nemi ipapo, ari kunamatira murume wake asati aponeswa. Mwari achapa kupodzwa ikoko.

Ngatinamatei.

²⁴⁰ Mwari anodikanwa, ndinonamata kuti mumupe ropafadzo iroro. Ipai mudzimai iyeye chishuwo chemoyo wake, Ishe. Kutenda kwake kuri pedyosa neMi, kwakubatai Imi. Uye ndinonamata, Baba, kuti Mubatsire, muZita raJesu. Ameni.

²⁴¹ Zvino tendai nemoyo wenyu wose, kuti mugozvigamuchira. Mungaita izvozvo here? Zvakanaka. Mwari akuprafadzei.

²⁴² Unotenda here kuti murume wako achaponeswa, mudzimai? Unotenda here nemoyo wako wose? Simudza ruoko rwako, unotenda.

²⁴³ Panoita sepane, pamberi pangu, mudzimai akafuta zvikuru. Heunoi uyo agere apo. Unotenda here kuti ndiri muranda waMwari? Unotenda here kuti ndiri muranda waMwari? Unotenda. Zvakanaka. Handikuzive. Dambudziko rako, ndere tsinga. Wava kunyanyisa kurema. Wakamboenda kuna chiremba, akati hapana chaanogona kuita nezvazvo, asi uyu akanga ari chiremba wepanyika. Maona? Wako...Iwe wanga une kusuruwara kwakawanda. Wakarasikirwa nemurume wako. Hausi wemuno. Unobva chaizvoizvo kuArkansas. Uri kutsvaga basa, zvakare, uye hausi kuwana basa. Wanga uchitya kuti, chimwe chinhu, kuti hauzosheedzwi. Asi kutenda kwako zvino kwabata Mwari. Hanzvadzi yangu, iwe enda, utende. Mwari ngaakupe basa, akupe chishuwo chemoyo wako.

²⁴⁴ Mwari anoratidza Shoko raKe kuti nderechokwadi. Munotenda kuti ndizvo here? [Ungano inoti, "Ameni." — Mupepeti.] Zvino ndinoda kuti mungonamata nenii zvakare.

²⁴⁵ Mwari, Baba, Muri Mwari mumwe chete akaratidza. PaMakati, "Musikana haana kufa, akarara," zvino iMi maifanira kuzozviratidza. Zvino, Makavimbisa, kuti nguva yekupedzisira yoda kusvika, kuti Mwanakomana wemunhu achazvizarura pachaKe nenzira imwe chete zvaAkaita paSodhoma. Makazvivimbisa, Ishe. Zvino Mauya panyika, muchimiro cheMweya Mutsvene, uye mukapinda pakati pedu, manheru ano, isu vanhu vanotenda, uye mazviratidza. Maratidza Shoko reNyu sezvaMakaita zuva riya. Ishe, hatischada umwe umboo zvakare. Muri pakati pedu. TinoKudai. Uye tinocherechedza kuti ichi ndicho chiratidzo chekupedzisira Kuuya kweNyu kwave kusvika, zviri maererano neMagwaro. Uye mimvuri yese nemifananidzo yese hazvife zvakakundika. Zvinofanira kuva saizvozvo.

²⁴⁶ Saka tinonamata, Baba, apo vana veNyu vari kuuya zvino kuzonamatirwa, kuti vese vapodzwe. Ngapasawanikwa munhu anosara achirwara pakati pedu, pakupera kweshumiro yekupodza ino. O Mwari vanodikanwa, Mungaite here kuti chizoro cheNyu chiuye nenyasha pamusoro pevanhu veNyu iye zvino, kuti mumwe nemumwe wavo agopodzwa?

²⁴⁷ Uye kana pane vamwe pano, vasati vava vana veNyu, uye pamusoro penheyoye yezvinhu izvi, kuti...Vanzwa Shoko vakaona zvinhu zvichiftwa, zvichinyatsoratidzwa kusvika pavara rega-rega, uye kuti iMi Muri ani uye nezvaMuri, kuti Muri pano.

²⁴⁸ Uye, Ishe, Munga—Mungaropafadza nhema here? Handiti, kwete zvechokwadi, Ishe. Asi Makavimbisa kuropafadza Shoko reNyu, uye haRizodzokere risina chinhu. Richazadzisa

chinangwa icho chaRakatumirwa. Uye zvino Maita izvozvo pamberi pedu, manheru ano, pasina kana mumvuri wekupokana.

²⁴⁹ Zvino takakotamisa misoro yedu, pane vanhu here pano vasati vambotenda kumashure, vangada kungosimudza maoko avo? Musoro wako wakakotamiswa, chingosimudza ruoko rwako. Uye womira netsoka dzako, woti, "Ndava kutenda zvino, nemoyo wangu wose. Uye ndinoda kugamuchira Jesu Kristu, izvezvi." Ungadaro here, chero munhu zvake, ani zvake ari pano, asati agamuchira Kristu, uye achida kuzviita panguva ino? Handikuudzei... Unoenda kukereke yaunoda. Asi ndiri kukukumbira kuti ugamuchire Jesu Kristu uchiri... Zvimwe hauzombofa wakaswedera padyo naYe kusvikira waMuona paузима paAchauya ari mumutumbi waKe unooneka achibva Kumatenga. UngaMugamuchira here iye zvino kana wanga usati wambozviita?

²⁵⁰ Nokuda kwekusaona kana mumwe pano akamira, ndinotenda zvino kuti mese mune pfungwa dzakakwana, vanhu vanonzwisisa, uye munocherechedza zvamuri kuita. Kana makagara ipapo pasi peizvi, rangarirai, "Kana uchiNdinyara pamberi pevanhu, iNi ndichakunyarawo pamberi paBaba vaNgu." Panga pane mumwe munhu anga akamira, zvichida, hongu, muungano, kumashure.

²⁵¹ Mwari anodikanwa, avo vanogona, ini ndisingaone, avo vakamira, vanoda kuKugamuchirai. Vanocherechedza, Ishe, kuti izvi hazvina kumboitwa kusvikira panguva ino, uye zvino Mazvisimbisa uye nokuratidza kuti ndizvo. Ndinonamata, Baba, kuti mumoyo yavo, yafambisva zvinganzwisisike panguva ino... Tinoziva sei kuti haasi here munhu wekupedzisira kupinda? Aya anogona kunge ari magumo eLos Angeles. Uyu unogona kunge uri mweya wekupedzisira uchazvarwa muHumambo. Hativive pachasvika nguva iyoyo. Uye painouya, musuwo uchavharwa, Mutumbi uchange wakakwana. Unenge usiri Mutumbi wakakanganisika kana Mwenga akakanganisika. Unenge une nhengo dzakakwanirana dzine mazita adzo akaiswa muBhuku reHupenu reGwayana nyika isati yavambwa, avo Jesu akauya kuzotora, saAdhama, akanyatsoenda kunoponesa mudzimai wake. Ndinonamata, Mwari, kuti Muvagamuchire zvino Muhumambo hweNyu. Vari mumaoko eNyu. Shandai navo, Ishe, ndinonamata nemuZita raJesu. Ameni.

²⁵² Mwari aropafadze mumwe nemumwe wenyu asimuka. Handina kuziva kuti vamwe venyu vanga vakamira. Vamwe vamira kumashure, vamwe pamusoro pabharikoni. Zvino ndinoda kuti mundiitire chinhu chimwe chete. Ndapotra ndinzwisisei. Moona mumwe mushumiri ari pano motaurirana nezvazvo navo, mushure mekunge chechi yapera. Mungadaro here? Musarega zvichikundika. Kana wanga usati wabhabhatidza nerubhabhatidzo rweChikristu, chinotevera

ita izvozvo, uye woramba wakasimudza maoko ako kusvikira wagamuchira Mweya Mutsvene.

²⁵³ Iye zvino, uye vanhu vazhinji pano vane makadhi ekunamatirwa. Tichavakumbira kuti vasimuke, vouya kuno, uye ndinofunga kuti vafambe nepakati. Kana kuti ndiuye ikoko... [Mumwe murume anoti, “Kwete.”—Mupepeti.] Handingazokwanisi. [“Huyai nekudivi riri nechekuno uku.”] Kubva nekurutivi *urwu* rwuri kuno, munogona kuuya muchibuda nekuno uku, nechekurutivi rwuno, vanhu vane makadhi ekunamatirwa.

²⁵⁴ Zvino kana pane mumwe wenyu anofanira kuenda, zviri... ndanonoka. Ndine hurombo. Ndichaedza kuita zviri nani mangwana manheru. Pa...ava maminitsi gumi tadarika awa yegumi, kubva pawachi iri kumadziro. Ndinokutendai chaizvo nekuuya kwamaita manheru ano, uye dai Mwari weKudenga akuropafadzai. Kana uchida kusara uchiona mutsara wekunamatirwa, unogamuchirwa. Asi tava kutanga kunamatira vanorwara zvino, uye handidi kukubatai kunze kwekunge kana muchida henyu kusara. Munogona kuchienda henyu nemuZita raIshe Jesu. Dai runyararo rwaMwari rwaenda nemi uye nokukuropafadzai, uye rwukupei zororo mumitumbi yenyu, husiku hwese, uye nokukupai utano hwakanaka kuti muzogona kudzoka zvakare mangwana manheru. Mwari ave nemi zvino.

²⁵⁵ Zvino regai avo vane makadhi ekunamatirwa vamirire kuti vanamatirwe zvino, sezvo tinonamatira vanhu kweskewese. Zvino tinoda kuti muzive, zvino, iwe wakamira uine kadhi rekunamatirwa, pane kupokana here muhupenyu hwako? Pane here, ndine urombo, chero chivi muhupenyu hwako chausati wareurura? Kana chiripo, rega ndikukumbire izvi. Usauya mumutsara wekunamatirwa nechivi chisina kureururwa mumoyo mako. Nekuti, unofanira...Ichi chingwa chevana, munoono. Uye kana usiri Mukristu, pira hupenyu hwako kuna Kristu, mumutsara wekunamatirwa, wozouya. Ndezvevatendi. Mungazviita here? Mugamuchire kutanga seMuponesi wako, zvadaro wozouya nepapuratifomu, kuzonamatirwa.

²⁵⁶ Zvino ndichanamatira munhu mumwe nemumwe; kwete kungopfuura nepavari, semamwe maitiro emazuva ose. Tiri mukereke zvino. Ndinofunga kuti Hanzvadzi Wyatt vatipa chikonzero chatinogona kusarira tichinamata. [Mumwe murume anoti, “Hongu, husiku hwese, kana muchingoda.”—Mupepeti.] Tinogona kugara kusvikira patinodira. Uye ndinotenda Hanzvadzi Wyatt nevanoshanda pano, nekutitendera kuita izvozvo. Mwari avaropafadze. Murume wavo mhare akamira papuratifomu pano, achinamatira vanorwara, kusvikira afa, semaziviro andinoita, gamba chairo remuchinjikwa. Uye zvino ndiri kuedza kuramba ndichiita zvimwe chete, kuropafadza vanhu ivava.

²⁵⁷ Uye zvino ndinonamata kuti mumwe nemumwe wenyu auye achipfuura nepano...Hausungirwe kuti ureurure chero chaunoda. Hausungirwe kutaura kana chinhu chakanganisika pauri. Chingouya wonditendera kuti ndikunamatire, uye wotenda.

²⁵⁸ Munotenda here kuti Mwari akanditura kuzoita izvi? Simudza ruwoko rwako. Munorangarira here izvo zvakataurwa neNgirozi yaShe? “Kana ukaita kuti vanhu vakutende, woperera kana uchinamata, hapana chinozomira pamberi pemunamato.” Uye munoziva kuti ichokwadi. Zvakaratidzwa, kakawanda.

²⁵⁹ Zvino ndichakumbira Hanzvadzi yedu Rose, kana vachikwanisa, kuridza chiya, *Tenda Chete*, kana, *Murapi Mukuru Ari Pedyo Zvino*, kana chimwewo.

²⁶⁰ Ndinoda kuti mumwe nemumwe wenyu zvino muve mu-mukuyanana neni. Mungadaro here, zvakare, imi vanhu vasiri mumutsara wekunamatirwa, mungava here muchinamatira vanhu ava? Zvakanaka, vavimbise izvozvo, nekusimudza ruwoko rwako, “Ndichange ndichinamata, munoonaa. Tese tichange tichinamata.” Zvakanaka. Hongu.

²⁶¹ Ndingada kuti kana muchikwanisa, kana muchifanira kuenda, endai chinyararire iye zvino, kuti vasazokanganisa kana tonamata.

²⁶² Munotenda here kuti zvichapera zvino, hanzvadzi? [Hanzvadzi inoti, “Nemoyo wangu wese.”—Mupepeti.]

²⁶³ Mwari anodikanwa, ndinoisa maoko angu pamusoro pehanzvadzi, ndichipikisana nedambudzikro riri mumutumbi make. MuZita raJesu Kristu, ngarimusiye. Ameni.

Ropafadzwai, hanzvadzi.

²⁶⁴ Unotenda here nemoyo wako wose? Zvivi zvako zvese zvakareururwa here? Uri, semaziviro aunoita, wagadzirira here kugamuchira kupodzwa kwako?

²⁶⁵ Mwari anodikanwa, ndinoisa maoko angu pamusoro pehanzvadzi yangu, muZita reMwanakomana weNyuu, Jesu Kristu, uye ndichikumbira kuti dambudzikro remuviri wake richaenda, muZita raJesu. Ameni.

²⁶⁶ Zvivi zvese zvakareururwa here, uye wagadzirira here kupodzwa kwako? Munotenda here, hama? [Hama inoti, “Ndinotenda nemoyo wangu wose.”—Mupepeti.]

²⁶⁷ Mwari anodikanwa, ndinoisa maoko angu pamusoro pehama yangu, sezvatinoziva kuti iMi muripo pano, Ishe. Ndinonamata kuti Mumupodze, muZita raJesu Kristu. Ameni.

²⁶⁸ Zvivi zvese zvakareururwa here? Kwete, hamunzwe. [Hama Branham vanotaura zvishoma nezvishoma zvakajeka nekuda kwekusanzwa kwehanzvadzi—Mupepeti.] Unotenda here kuti

uchanzwa? [Hanzvadzi inoti, “Ndinotenda. Asi ndanga ndiri matsi.”] Munotenda.

Mudzimai uyu imatsi zvino. Tava kunamata pano.

²⁶⁹ Mwari anodikanwa, ndinonamata kuti Mupodze hanzvadzi yedu, mobvisa humatsi kubva maari. Akagara munyika yakavharwa, yaasingagone kunzwa. Ndinonamata kuti Mumupe kupodzwa kwake, nemuZita raJesu.

²⁷⁰ Ndichakumbira vanhu kuti murambe makakotamisa misoro yenu, kwechinguvana. Ndinoda kuona kuti chii chaitika kwaari. Zvino, ndapota, muZita raJesu Kristu, ngapashaikwe anosimudza musoro wake kana maziso ake. Zvino, hamufanire kuzviita kusvikira ndakuudzai kuti muchidaro.

²⁷¹ Wava kundinzwa here iye zvino? [Mudzimai anoti, “Zvimwe hazvisi kunyatsonzwika.” Hama Branham vanoombra maoko avo kamwe chete. “Ndiri kukunzwai.”—Mupepeti.] Uri kundinzwa here? [“Zvimwe.”] Wava kunzwa here? Ava kunzwa iye zvino. [Hama Branham vanoombra kamwe chete zvakare.] Maona? Wanzwa ruzha here?

²⁷² Zvino iwe chitenda nemoyo wako wose. Uchadaro here? Zvino iwe tenda, uye Mwari achakupodza zvakazara. Ataura kudaro. Ndangonamata uye ndokuisa maoko angu panzeve dzake, zvino ati ava kunzwawo zvimwe. Zvakanaka, chingoenderera mberi zvino, uchitenda kuti uchanzwa zvakanyatsonaka, uye uchazonzwa.

²⁷³ Zvivi zvese zvakareururwa here, hanzvadzi? [Hanzvadzi inoti, “Hongu.”—Mupepeti.] Wagadzirira here kupodzwa kwako? [“Hongu.”]

²⁷⁴ Mwari anodikanwa, ndinoisa maoko angu pamusoro pehanzvadzi yangu, ndichiziva kuti matiri hamuna chinhu chakanaka, pachezvedu. Asi tinoziva kuti tiri Makristu, akazvarwa neMweya waMwari. Uye tinoissa maoko pamusoro pehanzvadzi yedu tichikumbira kupodzwa kwake, muZita raJesu Kristu. Ameni.

²⁷⁵ Zvino unotenda here kuti uchapodzwa? [Hanzvadzi inoti, “Zvakanaka!”—Mupepeti.] Zvakanaka, zvino wa—wapodzwa. [“Hongu!”] Ndiwo maitirwo azvo. Ndizvo chaizvo. Ndizvo.

²⁷⁶ Zvivi zvese zvakareururwa here? [Hanzvadzi inoti, “Hongu, changamire.”—Mupepeti.] Uye wagadzirira here kupodzwa kwako? [“Hongu.”] Unotenda here, kuti nekuisia maoko pamusoro, kuti Mwari Anoziva moyo yevanhu, achakupodza? [“Ndinotenda.”]

²⁷⁷ Baba vedu vari Kudenga, ndinonamata kuti Mupodze hanzvadzi yedu, tichiisa maoko edu pamusoro pake tichikumbira muZita raJesu Kristu kuti Muchamupodza. Ameni.

²⁷⁸ Makadini? Handiti, unoziva kuti ndinoziva dambudziko raunaro. [Hanzvadzi inoti, "Hongu."—Mupepeti.] Asi handisi kuzoritaura; nekuti, unodaro, richa—richaramba richingoenda rakadaro. ["Zvakanaka."] Asi kana ukagona... Zvivi zvese zvakareururwa here? ["Hongu, changamire."] Uye unotenda here kuti Mwari achakupodza? ["Hongu, changamire."] Unotenda here kuti chirwere chearthritis... Ndatozvitura.

²⁷⁹ Mwari anodikanwa, ndinonamata kuti Mumubatsire uye mumupodze. Zviitei, muZita rajeSu.

Hauzove wakaremara. Enda, tenda nemoyo wako wose.

²⁸⁰ Unotenda here kuti Mwari achakupodza? [Hanzvadzi inoti, "Ameni."—Mupepeti.] Zvivi zvese zvakareururwa here uye wagadzirira here kupodzwa kwako? Unotenda kuti musana wako uchaita zvakanaka here?

²⁸¹ Baba vanodikanwa vari Kudenga, ndinonamata kuti Mumupodze uye nokumuita mutano. MuZita rajeSu Kristu, ngazvive saizvozvo. Ameni.

Mwari akuropafadzei, hanzvadzi. Endai, muchitenda zvino.

²⁸² Zvivi zvese zvakareururwa here, hanzvadzi, magadzirira here kupodzwa kwenyu?

²⁸³ Mwari anodikanwa, zvivi zvake, ati iye, zvakareururwa. Ndinoisa maoko angu pamusoro pemudzimai uyu, muZita rajeSu Kristu, ndichikumbira kupodzwa kwake. Ameni.

²⁸⁴ Zvivi zvese zvakareururwa here? Unofanira kupora, uri kurwara zvakanyanya, unoqviviza izvozvo. Unoziva kuti ndinoziva kuti chii chakanganisika pauri. Uye unotenda here kuti Mwari achakupodza, opodza moyo wako okupa hutano hwakazara?

²⁸⁵ Mwari anodikanwa, ndinonamata muZita rajeSu Kristu, kuti Mumupodze nokumuita kuti aite zvakanaka. Dai izvi zvamusiya, Baba, muZita rajeSu. Ameni.

Mwari akuropafadze zvino. Usapokana. Enda, uchitenda.

²⁸⁶ Zvivi zvese zvakareururwa here? Wagadzirira here kupodzwa?

²⁸⁷ Baba vanodikanwa vari Kudenga, ndinoisa maoko angu pamusoro pehanzvadzi yedu. MuZita rajeSu Kristu, ngaapodzwe. Ameni.

Usapokana. Enda, uchitenda.

²⁸⁸ Zvivi zvese zvakareururwa here, wagadzirira here kupodzwa?

²⁸⁹ Baba vanodikanwa vari Kudenga, ndinonamata kuti Mupodze hama yedu, mumuite kuti aite zvakanaka. Zviitei, Baba. Ndinoisa maoko angu paari, nechikonzero ichocho, muZita rajeSu Kristu. Ameni.

Mwari akuropafadzei. Ndinozvitenda nemoyo wangu wose.

²⁹⁰ Mava kutenda here zvino, hanzvadzi? Zvivi zvese zvakareururwa here uye magadzirira here kupodzwa?

²⁹¹ Mwari anodikanwa, ndinoisa maoko angu pamusoro pehanzvadzi, muZita raJesu Kristu, ngaapodzwe kuti Mubwinyiswe. Ameni.

²⁹² Zvino nguva dzakawanda saidzodzi, kungobata chete, sezvakataurwa naJesu kuti, “Zviratidzo izvi zvichatevera avo vanotenda. Kana vakaisa maoko avo pamusoro pevanorwara.” Ndatanga kucherechedza, mumisangano, kuti zvinoshanda zviri nani zvikamu makumi mashanu kubva muzana kupfuura zvazvinoita kana ukadana vanhu kuuya mumutsara, wova nekunzvera, nekuti unongosvika kune vashoma. Zvino, ukadai, pane vamwe vakawanda vanopodzwa.

²⁹³ Wareurura here zvivi zvako zvese zvekusatenda nezvimwe zvese? Wava kutenda here iye zvino kuti uchapodzwa? [Hanzvadzi inoti, “Hongu, nekudzikinurwa.”—Mupepeti.]

²⁹⁴ Mwari anodikanwa, ndinonamata kuti Mupodze hanzvadzi yedu ndichitora maoko ake ndichikumbira muZita raJesu Kristu kupodzwa kwake. Ameni.

Mwari akuropafadzei, hanzvadzi.

²⁹⁵ Mava kutenda here iko zvino? [Hanzvadzi inoti, “Hongu.”—Mupepeti.] Zvivi zvese zvakareururwa here? [“Hongu.”]

²⁹⁶ Mwari anodikanwa, ndinoisa maoko angu pamusoro pehanzvadzi yedu, muZita raJesu Kristu, kuitira kupodzwa kwake. Ameni.

Mwari akuropafadzei, hanzvadzi.

Zvinoita sechinhu chidiki, asi ndiMwari Akazvivimbisa.

²⁹⁷ Zvivi zvakareururwa here?

²⁹⁸ Mwari anodikanwa, ndinonamata kuti Mupodze iyi hanzvadzi yedu. Ndichiisa maoko pamusoro pavo muZita raJesu Kristu, ngaaende anopodzwa. Ameni.

²⁹⁹ Zvivi zvakareururwa here?

³⁰⁰ Mwari anodikanwa, ndinonamata kuti Mupodze hanzvadzi yedu, ndichiisa maoko pamusoro pavo, muZita raJesu Kristu. Ameni.

³⁰¹ Zvino muchiuya nehurongwa hwezvinoshanda, ngazvirove simba rnofambisa, zvichabva zvashanda.

³⁰² Zvivi zvakareururwa here? [Hanzvadzi inobva yapindura—Mupepeti.] Magadzirira.

³⁰³ Mwari anodikanwa, ndinonamata kuti Mumupodze uye mumuite mutano, nemuZita raJesu Kristu. Ameni.

Mwari akuropafadzei, hanzvadzi.

³⁰⁴ Zvivi zvese zvakareururwa here? [Hanzvadzi inoti, “Zvese.”—Mupepeti.]

³⁰⁵ Mwari anodikanwa, sezvo mudzimai uyu akanditarisa mumaziso, ndinozvitenda. Ndinonamata kuti Mumupodze, muZita rajesu.

³⁰⁶ Muri kungomuunza, ndizvo here, hanzvadzi? Muri kungomuunza? Zvakanaka. [Hanzvadzi inoti, “Ibofu, zvakare.”—Mupepeti.] Munotenda here, hanzvadzi, kuti Mwari achakupodzai? [Hanzvadzi bofu inoti, “Ndinotenda kuti Mwari anokwanisa kuti ndione zvakare.”] Mwari akuropafadzei.

³⁰⁷ Baba vari Kudenga, Munogara nguva dzose mune tsitsi kumapofu, nekune vanoshaya. Zvino vaona zvaMaita manheru ano. Saka tinotenda, Ishe, chiratidzo chikuru ichi chokupedzisira chiri kufamba pakati pedu iye zvino. Ndinokumbira kuona kwemudzimai uyu bofu kuti kudzoke kwaari, muZita rajesu Kristu. Ameni.

³⁰⁸ [Uyo anga ari bofu, anoti, “Mazviita, Jesu.”—Mupepeti.] Zvino, titaurire zvino. Zvitaure. [“Ndichadaro!”]

³⁰⁹ [Uyo anga aunza hanzvadzi bofu, anokumbira kunamatirwa—Mupepeti.] Oo, hongu, unotenda here kuti Mwari achakupodza? [“Hareruya!”]

³¹⁰ Baba vanodikanwa vari Kudenga ndinoisa maoko angu pamusoro pehanzvadzi yedu ndichikumbira kuti Mumupodze, muZita rajesu Kristu. Ameni.

³¹¹ Mwari akuropafadzei, hanzvadzi. Regai tinzwe kuti mava—mava kunzwa sei.

³¹² Munotenda here, hanzvadzi? [Hanzvadzi inoti, “Hongu, ndinotenda.”—Mupepeti.]

³¹³ O Baba Vanodikanwa vari Kudenga, ndinonamatira hanzvadzi yedu, ndichivimba kuti Muchavapodza iye zvino. Ndinoisa maoko angu pamusoro pavo, muZita rajesu Kristu.

Zvino tendai. Ndizvozvo. Chingoendai, muchitenda.

³¹⁴ Munotenda here, hama? [Hama inoti, “Hongu.”—Mupepeti.] Zvivi zvese zvakareururwa here?

³¹⁵ Mwari anodikanwa, ndinonamata kuti Mupodze hama yedu momuita mutano, muZita rajesu Kristu. Ameni.

³¹⁶ Munotenda here, hanzvadzi?

³¹⁷ O Mwari, ndinonamata kuti, nemuZita rajesu Kristu, mukuzvininipisa, mukutapira nehunyoro hwenguva ino, dai Mweya Mutsvene waita kuti mudzimai uyu ave akakwana. [Hanzvadzi inoti, “Uye ndinokumbira, munamatire mwanakomana wangu. Handisati ndamuona kwemakore makumi maviri.”—Mupepeti.] Ndinonamata kuti Mwari atumire mwanakomana wenyu kwamuri, hanzvadzi, mudikanwi. Mwari akuropafadzei.

³¹⁸ Baba vanodikanwa, ndinonamatira hanzvadzi yedu iri pano. Mukutapira kweMweya Mutsvene, ngaAuye zvino apodze hanzvadzi yedu, muZita raJesu. Ameni.

Ropafadzwai, hanzvadzi.

³¹⁹ Mwari anodikanwa, ndinonamatira hama yangu, paakamira pano ndinoisa maoko pamusoro pake, ndichikumbira kupodzwa kwake, muZita raJesu.

³²⁰ Ropafadzwai, hama yangu. [Hama inoti, “Mwari akuropafadzei.”—Mupepeti.] Zvakakanaka.

Mukomana mudiki here?

³²¹ Mwari anodikanwa, ndichiisa maoko pamudiki uyu, ndinomuropafadza muZita raJesu Kristu, kuitira kupodzwa kwake.

³²² Munotenda here iye zvino, hanzvadzi? [Hanzvadzi inoti, “Hongu.”—Mupepeti.] Munodawo kunamatirwazve?

³²³ Mwari anodikanwa, ndinomunamatira, ndichiisa maoko pamusoro pake. Zvino, uku ndiko kutuma kweNy, ndizvo zvaMakati tiite, “Zviratidzo izvi zvichatevera avo vanotenda. Kana vakaisa maoko pane vanorwara, vachapora.” Makazvitura, Ishe. Ameni.

Zvino, Akazvitura, haAna here? Zvinofanira kuve saizvozvo, hanzvadzi.

³²⁴ Mwari anodikanwa, ndinonamata kuti Mupodze hanzvadzi yedu uye mumuite mutano, muZita raJesu Kristu. Ameni. Mwari akuropafadzei, hanzvadzi.

³²⁵ Mauya muchitenda here, hanzvadzi?

³²⁶ Baba vanodikanwa vari Kudenga, ndinokumbira maropafadzo eNy, pahanzvadzi yedu, tichingoteerera zvaMakati tiite. Makati, “Zviratidzo izvi zvichatevera avo vanotenda. Kana vakaisa maoko avo pamusoro pevanorwara,” Makati, “vachapora.”

³²⁷ Regai ndimbomira pano zvishoma, kuti nditaure izvi, kuti ndiregedze vanhu vambozorora kwechinguvana, kwechinguvana. Mumwe mutsoropodzi akamboti, kwandiri, handizvo. Asi, munona, Akati, “Zviratidzo izvi zvichatevera.”

³²⁸ Makanzwa Mharidzo yangu pamusoro peKugadzwa Dare, kuisa Jesu pakutongwa. Munona, Akaudza Noa, “Kwaizonaya.” Hakuna kunaya kwemakore zana nemakumi maviri, asi kwakazonaya zvakadaro. Akaudza Abrahama kuti aizova nemwanakomana naSara. Zvakazoitika makore makumi maviri nemashanu akatevera. Haana kumbotaura kuti rindi. Akati vaizova nemwanakomana iyeye. Makore makumi maviri nemashanu akatevera, zvakazoitika. Munona, haAna kumboti rindi.

³²⁹ Akati, “Munamato wekutenda uchaponesa vanorwara. Mwari achavamutsa. Kana vakaisa maoko pamusoro pevanorwara, vachapora.” Ndizvo here zvaAkataura? [Ungano inoti, “Ameni.”—Mupepeti.] Haana kumboti vachasvetuka mudenga vozviita pakare ipapo. Akati, “Vachapora.” Munona, ndiyo vimbiso yaKe. Ndizvo zvatinotenda.

³³⁰ Huyai, hanzvadzi. Munotenda here kuti ichocco ichokwadi? [Hanzvadzi inoti, “Hongu, ndinotenda.”—Mupepeti.] Zvino hapana chinokutadzisai kupodzwa.

³³¹ Ndinoisa maoko angu pamusoro pehanzvadzi, muZita raJesu Kristu, kuti apodzwe. Ameni.

³³² Munotenda here, hanzvadzi? [Hanzvadzi inoti, “Hongu.”—Mupepeti.] Zvivi zvese zvakareururwa here, uye magadzirira?

³³³ Mwari anodikanwa, ndinoisa maoko angu pamusoro pehanzvadzi, ndichiterera rairo yeNy, uye ndichikumbira kupodzwa kwake, muZita raJesu. Ameni.

³³⁴ Ndinoda imi vari kunamatirwa, ndinoda kuti mundiitire fevha. Ndinoda kuti mutaure, misangano ino isati yapera, zvinenge zvaitika; uye moita kuti ungano, vamwe vanhu, vaone chaizvoizvo zvinoitika. Zvimwe mangwana, zuva rinotevera, kana rinthi, chingotorisai zvinenge zvichiitika.

³³⁵ Tsamba dzandinonyorerwa dzakaratidza kuti zvaka—zvakanyanya kusiyana pane kungovaregedza vachiedza, kuedza kutenda kwavo. Nekuti, Jesu akati, “Vanoisa maoko pamusoro pavo. Vanoisa maoko pamusoro pavo, vachapora.” Zvino batai zvaAkataura. Haana kuti vachasvetuka nekumhanya vachikwira nekudzika mumba. Vanogona kutodaro. Asi Iye akati, “Vachapora.” Ndizvo here zvaAkataura? Ndizvo zvaAkataura. Ndizvo zvandinotenda. Uye Ari pano zvino, Uyo akataura Shoko ari pano kuriita kuti rive saizvozvo.

³³⁶ Munotenda here, changamire? [Hama inoti, “Ameni.”—Mupepeti.]

³³⁷ Baba vanodikanwa voKudenga, pamusoro pekupupura kweketenda kwake uye nekutenda, ndinoisa maoko angu pamusoro pake, muZita raJesu Kristu, kuti apodzwe. Zvakanaka.

³³⁸ Mwari anodikanwa, ndinoisa maoko angu pamusoro pemudzimai uyu, muZita raJesu Kristu, kuti apodzwe. Makati, “Achapora.”

³³⁹ Baba vanodikanwa, ndinoisa maoko angu pamusoro pemudzimai uyu, muZita raJesu Kristu, kuti apodzwe. Makati, “Achapora.”

³⁴⁰ Magadzirira kupodzwa here, hanzvadzi?

³⁴¹ Mwari anodikanwa, ndinoisa maoko angu pamusoro pake, muZita raJesu Kristu, kuti Mumupodze.

³⁴² Zvakanaka, hanzvadzi, mudikani, zvese zvagadzirira here kupodzwa? Kutenda kwako kwasanganikwa nako zvino, unotenda here kuti uchapodzwa?

³⁴³ Zvino, Mwari, ndinoisa maoko angu pamusoro pake, mukuterera murairo weNy, "Kunyika yese, zvisikwa zvese." Ndinoisa maoko pamusoro pake, muZita raJesu, kuti apodzwe.

³⁴⁴ Mwari anodikanwa, ndinoisa maoko angu pamusoro pehamu yangu, muZita raJesu Kristu, kuti apodzwe.

³⁴⁵ Mwari anodikanwa, ndinoisa maoko angu pamusoro pehanzvadzi yangu, muZita raJesu Kristu, kuti apodzwe.

³⁴⁶ [Chibenga chisina chinhu patepi—Mupepeti.]...kudzika nenzira yepakati pamacheya. Ndanga ndisingade kukunetesai. Muchaita zvakanaka kana mukazvitenda izvozvo iye zvino.

³⁴⁷ Mwari anodikanwa, ndinonamata kuti Mupodze hanzvadzi yangu, muZita raJesu Kristu. Ameni.

³⁴⁸ [Chibenga chisina chinhu patepi—Mupepeti.]...kundibatsira kunamatira vanhu ava.

³⁴⁹ Zvino tine mahengechepfu pano, nezvakadaro, muno, anoda kunamatirwa. Uye ndinoda kuti murambe muchinamata nenizvino, zvino, mapasuru madiki aya, zvino. Ndinoziva kuti zvinoita sezvisinganzwisisike kwazvo kuti vanhu vanamatire chinhu chidiki seichi. Asi kana ukangokwanisa kuuya muhofisi mangu, kamwe chete, wongotarisa. Dai takachengeta zvapupu makore ese aya, ndinofunga waisagona kuunganidza papuratifomu pano, avo vakapodzwa nekungovatumira chete micheka yakanamatirwa iyi seizvi, mamiriyoni avo, kwese pasi rese. Zvino, munoziva here zvazviri—zvazviri?

³⁵⁰ Mumwe munhu ngaatorere hengechepfu iyo kune uyo—uyo mudiki... Uchazoziva hengechepfu yako, uchaiziva here, hama? Zvakanaka.

³⁵¹ Uye ndakaona vana vadiki, vakaremara vachipodzwa. Uye munoono, kuti chii, pangori panhu pekubata, sezvaiwanzotaurwa naOral Roberts. Pangori panzvimbio pekubata. Tinonamata. Zvino, hatiite izvi pachedu, tinoita izvi nekuti Bhaibheri rinotituma kuita izvi. Tese tinoziva kuti ichokwadi.

³⁵² Zvino, pane vanhu vakawanda avo vanozodza mahengechepfu, nezvakadaro. Saka, zvino, tinofunga kuti zvakangonaka, chokwadi, asi kana tikango... Bhaibheri harina kuti "vaizodza" mahengechepfu.

³⁵³ "Asi vakatora mahengechepfu kubva pamuviri waPauro." Zvino munoono here zvandanga ndichitura nezvazvo? Zvino, chavakaona, isimba riya rekumutsa rakanga riri muna Pauro, zvokuti vakaziva kuti akanga ari muranda waMwari. Vaiziva kuti Mwari akanga ari maari. Vaiziva kuti zvese

zvaaiabata zvairopafadzwa. Vangani vanozvinzwisisa izvozvo? Itii, "Ameni." [Ungano inoti, "Ameni."—Mupepeti.]

³⁵⁴ Munoziva, ndinofunga kuti Pauro akanga ari paMagwaro pane zvaakaita. Hamufungewo kudaro here? Munoda here kuti ndikuudzei pandinofunga kuti akawanepi zano rekuita izvozvo? [Mumwe munhu anoti, "Kubva kuna Erisha."—Mupepeti.] Kuna Erisha, ndizvozvo. Munoona, Eria akati, "Tora tsvimbo iyi woenda wonoisa pamwana." Zvino muporofita akatumira tsvimbo nekuti aiziva kuti zvese zvaaiabata zvairopafadzwa. Aiziva nzvimbo yake. Iye... dai aingogona kuita kuti mudzimai atende zvime chete.

³⁵⁵ Zvino onai, zvino, Bhaibheri harina kana kumboti, "Vachanamatira vanorwara." Rakati, "Vachaisa maoko pamusoro pevanorwara."

³⁵⁶ Zvino chingozvifungai, vanhu vakaona, mune muapostora Petro, Hupo hwaMwari huchiratidzwa mumurume uyu, zvekutoti vaka—vakatoradzika vanhu mumumvuri wake, uye vakapodzwa. Vangani vanoziva kuti zviri muMagwaro? [Ungano inoti, "Ameni."—Mupepeti.] Zvingori Gwaro saJohane 3:16. Munoona, Rese iShoko raMwari. Zvino, vanhu, munoziva kuti mumvuri wemurume iyeye hauna kupodza vanhu.

³⁵⁷ Asi, tarisai, kana simba raMwari rakanga riri pamuporofita iyeye, kwemakore nemakore mushure mekunge afa, zvekuti munhu akafa akakandwa pamusoro pemutumbi wake, mapfupa ake. Mutumbi wakanga usitomboripo ipapo; pakanga pane mapfupa. Uye Hupo hwaMwari hwakanga huri pamapfupa iwayo, kusvikira munhu akanga akafa akadzoka kuupenyu.

³⁵⁸ Zvino hamuzive here kuti Mwari mumwe chete iyeye akaita zvinhu zvose izvozvo ari pano manheru ano? Kwa—kwandiri, ndinofunga kuti tinofanira kunge tiri vanhu vanofarisisa pasi rese. Chingofungai pamusoro peizvi.

³⁵⁹ Ndi—ndinotarisira kuti handina kukonzera vatereri vangu kuti vatende kuti ndechimwe chinhu chandinoita ini pachangu. Imi—imi munoziva zviri nani kupfuura izvozvo. Ini, ndiri hama yenu, munona, uye ndingori hama yenu.

³⁶⁰ Asi ndinoziva, ndinoziva izvi, kuti Mwari ari pano. Uye ndinoziva kuti Atipa chimwe chinhu, chatsingagone kutsanangura, kunze chete neShoko raMwari, rinotaura kuti zvinofanira kuva pano panguva ino. Saka, zvinotipawo zvakare zvinozivisa kuti tiri kurarama mumazuva ekupedzisira. Zvinotipa zvinozivisa kuti vanhu ava, vakasarudzwa, vakasanangurwa, vakadanwa, vakafanotemerwa...

³⁶¹ Zvino, iro ishoko guru, *kufanotemerwa*, asi tese tinoziva kuti ichokwadi. Tinoziva chaizvo izvo kuti Mwari asina magumo akafanotemera zvinhu zvese nekufanoziva nyika isati yavambwa, kunyangé Gwayana rakabaiwa; uye nezita rose raizova muBhuku, rakaiswa muBhuku Bhuku risati

ratombonyorwa. Zvino vangani vanoziva kuti ichokwadi? [Ungano inoti, "Ameni."—Mupepeti.]

³⁶² Zvino Jesu akauya kuzo—kuzodzikingura avo vakanga vari muBhuku. MuBhaibheri, Gwayana rakauya richibva seri kweketeni, zvino rikatora Bhuku ndokuzarura Zvisimbiso zvaRakanga rakasimbisa nazvo, nokuti Akauya kuzotora vese vaAkanga akadzikingura. Ndiye Murevereri zvino, Murevereri achireverera avo vaAkadzikingura. Avo vese vane mazita akanyorwa muBhuku reHupenyu reGwayana, vachadzikingurwa.

³⁶³ Sezvandakataura chimwe chitaurwa chidiki chisina kuti tsvikiti pane humwe husiku...Ndakamirira...ose mahengechepfu aya ari pano. Handisi kungoedza kuparidza zvakare, asi ndataura kuti pane chitaurwa chidiki... Ndinovimba kuti izvi hazviite sekumhura, munoono. Asi semurimi akarindirisa tseketsa, asi yanga isina mazai akakwana, saka akatora zai rechapungu, akariisa pasi petseketsa rikachochonya chapungu. Zvino chaisanzwisisika pakati pehuku dzese, nekuti hazvaisaonerana pazvinhu. Asi ndizvo zvega zvachakanga chaona, yaiva tseketsa. Chakangonzwa inzwi rimwe chete-chete, raisanzwika seinzwi racho. Chaisatombogona kana kuita inzwi sere tseketsa kana nhiyo. Chaisafarira zvadzinodya, sezvo dzaidyira muchirugu. Pakanga pane chakasiyana pamusoro pacho, asi zvakadaro chaisaziva kuti mutsauko wakanga uri wei.

³⁶⁴ Zvino ipapo rimwe zuva, pakanga pana amai chapungu vaiziva kuti vakanga vakandira mazai mangani. Uye pakanga pane rimwe remazai iwayo, raifanira kuzova mwanakomana wavo, rakanga risipo. Saka vakaenda vachinomuvhima, vakamuwana ari muchirugu. Zvino vakadanidzira. Zvino pavakadanidzira, kachapungu kadiki kakaziva inzwi raamai vako. Sezvakataurwa naJesu kuti, "Makwayi angu anoziva Inzwi raNgu."

³⁶⁵ Ndinofunga, usiku hwapfuura, pandakaona boka riya remaBaptisti, Presbyteriani, nevamwezve, vanogona kunge vakakudzwa pasi pehuku. Ndiregerereiwo, hama, munoono. Asi Amai vaiziva kuti Vakanga vane vadikanwi vaVo kunze uko kune imwe nzvimbo. Saka varume avo vakamira apo, vasiri kuita nharo pachikafu chavakawana kubva kuna amai huku, nezvakadaro, asi zvino vava zvapungu, munoono, vanobhururuka kuti wawane chikafu chavo. Maona?

³⁶⁶ Uye ndinofunga kuti kereke yakafanana nechimwe chiitiko chandakaona nguva shoma yadarika, ndichibva kuTucson, kana ndichibva—ndichibva kuPhoenix, ndichienda kuTucson. Ndakaona chimiro chisinganzwisisike. Zvino zvakaita sokupwanya moyo wangu, kuona zvakanga zvaitika, kuti...

rukodzi, rwaisimbobhururuka mumhepo, hama yechapungu, unova mufananidzo wekereke.

³⁶⁷ Zvino Jehovha ndiye Chapungu. Aidana vaporofita vaKe kuti "zvapungu." Akazvidana pachaKe kuti, Jehovha, "Chapungu."

³⁶⁸ Asi rukodzi urwu rwakasorasikirwa kare-kare nekamuitiro kezvakari chaizvo, nekuti harwuchabhururuki nemumhepo rwuchizvivhimira nyama yarwo sezvarwunofanira kuita. Asi rwunogara patambo dzerunhare zvino rwoita segora. Ruu—rwunovhima tsuro dzakafa dzinenge dzatsikwa nemota, zvino irwo nemagora zvinoenda kunze ikoko zvodya pamwe chete. Ruunosvetukira segora, kunze kwekuti rwufambe nemafambiro arwunofanira kuita. Rwarasikirwa nekamuitiro kezvakari chaizvo.

³⁶⁹ Uye ndinotaura izvi nerudo rwese rweHumwari neruremekedzo, kereke yakarasikirwa kare nekamuitiro kayo sasisi wechapungu. Inogara hayo. Kunze kwekupinda muShoko kuti itsvage kuti zvinhu izvi ndizvo here, inomirira chibutwa chemabhuku eSunday school akanyorwa neboka rananyanjere kune imwe nzvimbo, imwe tsuro yakauraiwa kumwewo zvako. Inofamba segora! Mwari atibatsire kubhururukira kure naizvozvo.

³⁷⁰ Vimbiso idzi ndedzechokwadi. Kwete zvakataurwa nemumwe munhu pamusoro paZvo, asi zvakataurwa naMwari pamusoro padzo! Ndedzechokwadi. NdinoFara kwazvo kubatanidzwa nezvapungu.

Ngatinamatirei tese vanorwara vedu.

³⁷¹ Baba vanodikanwa vari Kudenga, zvinodzidziswa muBhaibheri kuti vakatora kubva pamutumbi waPauro, mahengechepfu nemaapuroni, madhimoni akabuda muvanhu, nemweya yetsvina ikavasiya. Zvino, Baba, ini ndakamira pano pane hengechepfu idzi, ndichimiririra munhu wese ari pano. Ndiwo Mutumbi waKristu, isu pamwe chete. Tiri kuzvitaura, nenyasha nerudo, kuti tiri pano kumiririra Mwenga waKe, uye tichitenda, tichibatana naYe muHumambo hwaKe. Uye tinoziva kuti hatisi Mutsvene Pauro, asi tinoziva kuti Imi muchiri Jesu.

³⁷² Uye tinonamata kuti Muremekedze kutenda kwevanhu ava. Dai vakarama kumashure mumazuva aPauro, vangadai vakanzwa Vhangeri rimwe chete irori, vakaona zvinhu zvimwe chete izvozvi. Naizvozvo, imhando imwe chete yevanhu. Muri Mwari mumwe chete. Saka ndinonamata, Mwari Anodikanwa, kuti Muremekedze kutenda kwavo, sezvaMakaitira avo venumazuva eBhaibheri. Uye dai simba rose remadhimoni, hurwere hwose, kutambudzwa kwese, zvakasunga vanhu ava vakamiririrwa nemahengechepfu nepasuru zviri pano, simba iroro rakaipa rehurwere ngarivasiye.

³⁷³ Zvakataurwa, imwe nguva, kuti Israeri yaifamba iri mugwara rebasa, kuenda kunyaika yechipikirwa. Uye ipapo vari mugwara rebasa, muvengi akauya akavaisa pakona, zvino Gungwa Dzvuku ndokuvavarira vari mugwara rebasa, uye nepakufamba kwavo. Zvino Mwari akatarisa kubva kumatenga, nemuShongwe yeMoto, zvino gungwa rikatya. Rakakungurutsira mafungu aro kumashure, nekuti mafungu aMwari akanga ari pasi pegungwa. Zvino Yakagadzira nzira yevana vaKe, vachifamba vari mugwara rokuteerera.

³⁷⁴ Zvino, Mwari, kana Gungwa Dzvuku rakanatya, rikakungurutsira mafungu aro kumashure, rikakungurutsira mvura yaro kumashure, uye rikapa nzira kuvana vaiva parwendo vachifamba mukuteerera; Mwari Anodikanwa, manheru ano, tarisai pasi kubudikidza nemuRopa reMwanakomana weNyuu, Jesu, Akaita vimbiso iyoyo. Uye hengechepfu idzi padzichaiswa pane mitumbi yevanhu inorwara, maziso aMwari ngaatarise, uye hurwere ihwohwo, dhiyabhoire iyeye, atye zvino obva aenda kure. Uye dai vanhu varamba vari parwendo rwekuNyika yechipikirwa, vaine hutano hwakanaka pamwe nesimba. SeIsraeri payaifamba murenje, pakanga pasina kana mumwe chete aiva nehutera pakati pavo, kune mamwe magumo. Ngazvipiwe kune vanhu ava, Baba, nekuti tinotumira hengechepfu idzi, muZita raJesu Kristu. Ameni.

³⁷⁵ Mwari akuropafadzei, mumwe nemumwe. Muchitora hengechepfu dzenyu zvino, imi tendai nemoyo wenyu wose. Munotenda here kuti Mwari anonzwa izvi? [Ungano inoti, "Ameni."—Mupepeti.] Maona? Ini, ndinoda kutaura izvi. Regai, musapokana, kana napaduku zvapo. Munoonaa, zvinogona kuratidzika sezvisinganzwisiseke zvakanyanya. Ndiregerereiwo, kwechinguvana. Musapokana, kana napadiki zvapo. Asi tendai zvino kuti, izvo zvatakumbira, Mwari anopa.

³⁷⁶ Munotenda here kuti ndiMwari ari pano, anoziva zvakavanzika zvemoyo wenyu? Munoziva uye nekutenda here kuti ndiMwari? [Ungano inoti, "Ameni."—Mupepeti.] Zvino chingogadzikanaai pfungwa dzenyu zvino, hachigone kuva chimwezve chinhua. Maona?

³⁷⁷ Zvino, ko kana dai kuine ramangwana rakakura, kure nemakore mazhinji akapfuura izvi zvingadai iri nhoroondo. Zvino kana vanhu, mumakore ari kuuya, kana zviri zvaizodaro, vaizouya voti, "Zvakanaaka, dai ndakararama nguva iyoyo, ndichizviona izvozvo zvichiipta, vakomana, ndizvo zvega zvandingadai ndakaziva. Ndingadai ndakazvitenda pakare ipapo!" Munoonaa, chinhua chimwe chete chaunotenda, dai wanga uriko kareko paAkazviita ipapo! Rangarirai, kuti achingori Iye. Ndiwo Hupenyu hwaKe huri mauri. Mwari akuropafadzei. 

KURATIDZA SHOKO RAKE SHO65-0426
(Proving His Word)

Mharidzo iyi neHama William Marrion Branham, yakaparidzwa kwokutanga neChirungu Muvhuro manheru, 26 Kubvumbi, 1965, mukonivhenisheni yeveFull Gospel Business Men's Fellowship International kuEmbassy Hotel muLos Angeles, California, U.S.A., yakazotorwa kubva patepi yakarekodwa ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice of God Recordings.

SHONA

©2019 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org